

ILUARSIISSUT

**Ataatsimiititaliap isumaliutissiissutaa 29. oktober 2018-imik ullulik taarserpaa.
(Kapitali 0-ip kiisalu ilanngussaq 5-ip aamma 6.1-ip ilanngunneqarnerat aammalu
ilanngussaq 2-p paasissutissanik nutaanik ilanngusiviginera)**

**Uunga siunnersuut: Nuummi aamma Ilulissani nunanit tamalaanit mittarfiit kiisalu
Qaqortumi nunap immikkoortuani mittarfiup sananeqarnissaannut,
ingerlanneqarnissaannut aningaasalersorneqarnissaannullu killiliussatut piumasaqaatit
pillugit Inatsisartut inatsisaat nr. xx, xx. xxx 2018-imeersoq
(Ineqarnermut Attaveqaqatigiinnermullu Naalakkersuisoq)**

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerreqarneranut

ISUMALIUTISSIISSUTAA

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Mala Høy Kúko, Siumut
Inatsisartunut ilaasortaq Sara Olsvig, Inuit Ataqtigiit, siulittaasup tullia
Inatsisartunut ilaasortaq Karl Kristian Kruse, Siumut
Inatsisartunut ilaasortaq Jess Svane, Siumut
Inatsisartunut ilaasortaq Aqqaluaq B. Egede, Inuit Ataqtigiit
Inatsisartunut ilaasortaq Niels Thomsen, Demokraatit
Inatsisartunut ilaasortaq Tillie Martinussen, Suleqatigiissitsisut

Ulloq 28. maj 2018-imi siullermeerinninnerup kingorna ataatsimiititaliap siunnersuut misissorpaa.

0. Siunnersuummut tunuliaqutaasooq pillugu

Mittarfiit pilersaaruserneqarnissaat sanaartorneqarnissaallu pillugit aalajangiiffigisassatut siunnersuutit marluk Inatsisartunit 2015-imi ukiakkut ataatsimiinnermi oqaluuserineqarlutillu akuersissutigineqarput.

Siullermik:

”Uunga siunnersuut: Imm. 1-imi allassimasutut, imm. 2-mi piffissamut pilersaarut allassimasoq naapertorlugu aammalu imm. 3-mi aningaasaleeriaasissat allassimasut akuleriissillugit mittarfinnik pilersaarusiornissamut sanaartornissamullu Naalakkersuisut peqquneqarnissaannik Inatsisartut aalajangiiffigisassa.” (UKA2015/18).

Siunnersuut Naalakkersuisunit saqqummiunneqarpoq aammalu Sanaartornermut Ataatsimiititaliap isumaliutissiisuteqareernerani allannguuteqartinnagu akuersissutigineqarluni. Pineqartut tassaapput mittarfiit uku pingaarnersiorlugit tulleriinnilersugaanngitsut:

- Ittoqqortoormiit: Nunap immikkoortuani mittarfimmik sananeq.
- Tasiilaq: Imapriup avannaani mittarfimmik sananeq.
- Qaqortoq: Imapriup avannaani mittarfimmik sananeq.
- Nuuk: Mittarfiup nunanit tamalaanit mittarfinngorlugu tallineqarnera.
- Ilulissat: Mittarfiup nunanit tamalaanit mittarfinngorlugu tallineqarnera.
- Kangerlussuaq: Mittarfinnut aningaasaleeqqinnissamut pisariaqartitanik piorsaaqqinneq paasiuminarsaanerlu il.il.

Ittoqqortoormiit, Qaqortoq Nuullu 2018-imi, Ilulissat 2019-imi kiisalu Tasiilaq 2022-mi atulersinnaasut taamani naatsorsuutigineqarpoq. Kangerlussuarmut tunngatillugu 2017-imi aalajangertoqassasoq Naalakkersuisunit naatsorsuutigineqarpoq.

Tassunga atatillugu paasissutissiisutigineqarpoq suliassat ataasiakkaat tamarmik (aningaasaliinissamut tunngavissat marlunnut avitaasut tunngavigalugit) Akiitsunut Aningaasaliisarnermullu Suliniutit naapertorlugit, taamatullu nunatsinni tamarmiusumi attaveqaatit ataatsimoorutut ataqatigiissullu eqqarsaatigalugit suliassat ingerlanissaannut nassuiaat aalajangersimasoq atorlugu Inatsisartut Aningaasaqarnermut Akileraartarnermullu Ataatsimiititaliaannut saqqummiunneqassasut.

Attaveqaqatigiinneq tutsuiginartooq, pissutsinut naleqquttoq ataqatigiissorlu, ullumikkornit anertunerusumik nunamik tamarmiusumik ataqatigissitsisussaq pilersinneqassasoq siunnersuuteqarnermikkut Naalakkersuisut kissaatigaat. Tamanna naammassisaqarsinnaalluartumik aammalu pitsaasumik uummaarissumillu ineriartortitsinermut tapertaassaaq, tamannalu naggataagut pisortanut annertuumik iluaqutissiissaaq.

Kiisalu Sanaartornermut Ataatsimiititaliap UKA2015/18 pillugu isumaliutissiisumini ilaati-gut makku pingaartippai:

- Tamakkiisumik sumut atugaanissaat isumannaarniarlugu Nuummi aamma Ilulissani mittarfiit minnerpaamik 2.200 miiterisut aamma Qaqortumi Tasiilamilu mittarfiit minnerpaamik 1.499 miiterisut sanaartugassatut pilersaarusiaanissat,

- Nuummi, Ilulissani aamma Kangerlussuarmi mittarfiit pillugit sanaartornermut pilersaarusiornerit misissuinerillu salliutillugit ingerlanneqassasut,
- Nuummi Ilulissanilu talliliinissanut atatillugu avataanit aningaasalersuinissamut avataanit aningaasalersuisartunit aamma/imaluunniit pisortat/namminersortut peqatigiilernissaannut periarfissat qulaajarneqarlutik aallarnisarneqassasut, kiisalu piginnittuuneq aningaasaliinerlu pillugit aaqqiissutaaratarsinnaasutut isumaqatigiinniarnerni angusat akuerisassatut UKA 2016-mi kingusinnerpaamik saqqummiunneqarnissaat,

Aappaattut:

”Assartuussinermi ataatsimut akissaajaatit annikillisinnissaat, timmisartuussisarnerup akulikillinissaa aamma unammilleqatigiinnerup annertusisinaanera siunertaralugit Mittarfinnik sanaartorneq pillugu Inatsisartut inatsisissaattut siunnersuummik qinigaaffimmi matumani Naalakkersuisut saqqummiussinissaannik peqquneqarnissaannut Inatsisartut aalajangiiffigisassaattut siunnersuut. Tamanna pissaaq mittarfiit, qulimiguullit mittarfiisa akunnisimaartarfiisalu piusut amerlanerpaamik 19-inut ilaasoqarsinnaasunut mittarfinnut millilernerisigut aamma allilernerisigut.” (UKA2015/167).

Siunnersuut Sanaartornermut Ataatsimiititaliamit saqqummiunneqarpoq. Siullermeerinninnermut atatillugu Naalakkersuisut allannguutissatut siunnersuummik matuma kingulianiit tumik saqqummiussipput, taannalu Sanaartornermut Ataatsimiititaliap isumaliutissiissummini inassuteqarneratigut akuerineqarpoq:

”Nunatsinni assartuussinermi ataatsimut aningaasartuutit annikillisinnissaat aamma timmisartuussisarnerup akulikillinissaa siunertaralugit, nunap immikkoortuini silaannakkut angallannermut attaveqaatit ataatsimoortut silaannakkut angallassinermut pilersaarummut ilanngunneqarnissaannik qinigaaffimmi matumani Naalakkersuisut saqqummiussinissamut peqquneqarnissaannut Inatsisartut aalajangiiffigisassaattut siunnersuut. Taamaalilluni suliaasaqarfimmi immikkoortumut pilersaarummi mittarfiit aamma qulimiguullit mittarfiisa akunnittarfiisalu pioreersut piginnaasaasa millineqarnissaat allineqarnissaallu nunap immikkoortuini tullerriarinnermut ilanngunneqassapput.”

Kalaallit Airports A/S-imik pilersitsineq:

Mittarfiliornissat pillugit sulinerup ingerlaqqinnera pillugu Naalakkersuisut qinnuteqaataat Aningaasaqarnermut Akileraartarnermullu Ataatsimiititaliamit ulloq 10. juni 2016-imi akuerineqarpoq.

Mittarfiliornissanik suliap ingerlaqqinnissaani atorneqartussamik aktiaateqarluni ingerlatseqatigiiffimmik nutaamik pilersitsinissap akuerineqarnissaa Naalakkersuisut inassutigaat. Ilanngullugu piginneqataassutissanik aningaasanngorlugit 200 mio. kr.-inik kiisalu Ilulissani, Nuummi Qaqortumilu mittarfinni atasuni taakkununngalu ilaareersut illut, teknikkikkut

sanaartukkat kiisalu pigisat nuunneqarsinnaasut aningaasaliissutiginnissaannut Naalackersuisut piginnaatinneqarput. Tamatuma saniatigut 100 mio. kr.-it tungaannut aktiaatileqatigiiffimmut akisussaaffitalimmik taarsigassarsisitsinnaanissamut Naalackersuisut piginnaatinneqarput.

Nuummi, Ilulissani Qaqortumilu mittarfinnik sanaartornissaq, piginnittuunissaq ingerlatsinissarlut aammalu taakkununga atasunik ingerlatsinissaq siunertalugit Kalaallit Airports A/S ulloq 1. juli 2016-imi pilersinneqarpoq.

Mittarfiliornissamik suliap aallartinneqarnera:

Naalackersuisut isummernissaannut tunngavissiami takorluugaq 3 naapertorlugu Nuummi, Ilulissani aamma Qaqortumi mittarfinnik pilersaarusiornissap aallartinneqarnissaannut Kalaallit Airports A/S-ip akuerineqarneranik Naalackersuisut nalunaaruteqarsinnaanerat ulloq 21. november 2017 Aningaasaqarnermut Akileraartarnermullu Ataatsimiititaliamit akuersissutigineqarpoq. Takorluugaq 3-mi siuliani taaneqartumi nalunaaruneqarpoq Ilulissani Nuummi mittarfiit 2.200 meterit Qaqortumi mittarfik 1.500 meteri sananeqassasut.

Tamatumanilu Kalaallit Airports A/S makkuninnga akuerineqarpoq:

- Mittarfinnik immikkoortitaakkanik nalunaarsukkat, annertussutsit sukkassutsillu naapertorlugit suliariumannittussarsiuussinissamik piareersaassasoq, takuuk takorluugaq 3-mi nassuiaat.
- Mittarfissat nassuiaatigineqartut sanaartornissaannut atatillugu taarsigassarsinissaq pillugu avataani suleqatinik isumaqatiginninniarnernik aallartitsisissasoq.
- 2018-imi ukiup affaata siulliup ingerlanerani taarsigassarsinissamut tunngavissarititaasunik qularnaveeqqusiissutinillu Naalackersuisunut akuerisassanik saqqummiussissasoq.
- Nuummi mittarfik pillugu 2018-ip aasaanerani suliariumannittussarsiuussinermik ingerlatsissasoq, tassanilu Naalackersuisut 2018-ip naannginnerani suliariumannittussarsiuussinerup inerneranik akuersinissaannik saqqummiivigineqassasut.
- Ilulissani aamma Qaqortumi mittarfinnik takorluugaq 3-mi nassuiaatigineqartunik immikkoortitaakkanik nalunaarsukkat, annertussutsit sukkassutsillu naapertorlugit suliariumannittussarsiuussinermik 2019-imi ingerlatsissasoq, Naalackersuisullu 2019-ip naannginnerani suliariumannittussarsiuussinerup inerneranik akuersinissaannik saqqummiivigineqassasut.

Kiisalu peqatigisaanik akuersissutigineqarpoq Kalaallit Airports A/S pillugu sanaartornermut inatsisissamik UPA 2018-imut piareersaasoqassasoq. Tassalu siunnersuut taanna maanna saqqummiunneqarpoq.

Kalaallit Airports A/S-imut aningaasaliissuteqarneq:

2018-imut aningaasanut inatsisissatut siunnersuutip suliarineqarneranut atatillugu konto pingaarnermut 10.13.11-mut, aktiaateqarluni ingerlatseqatigiiffimmut toqqaannartumik aningaasartuutitut tunngasumut, oqaasertaliussat arfinillit saqqummiunneqarput. Taakku Kalaallit Airports A/S-ip mittarfinnut nammineq aningaasaleeqataassutissaanut aningaasaliissutitut atugassiissutigineqartunut, taarsigassarsinissamut, qularnaveqqusiinissamut aammalu pissutsinut konto pingaarnermut 10.13.11-imut, aktiaateqarluni ingerlatseqatigiiffimmut toqqaannartumik aningaasartuutitut tunngasumut, attuumassuteqartunut tunngapput.

Oqaasertaliussap taassuma saniatigut pilersaarutaavoq inatsisitigut tunngavissat allat inatsisissatut siunnersuummik matuminnga saqqummiussinikkut pissarsiarineqarnissaat.

Siunnersuummut tunuliaqutaasut allat eqqarsaatigalugit siunnersuummut matumunnga nalinginnaasumik nassuiaatit innersuussutigineqassapput.

1. Siunnersuutip imarisaa siunertaalu

Siunnersuuteqartup oqaatigaa inatsisissatut siunnersuut suliap ingerlanerani, mittarfiit nutaamik ilusiligaanissaat pillugu Inatsisartut aalajangiineranni aallartinneqartumi, alloriarnerup tullerigaa.

Siusinnerusukkut oqaatigineqartutut inatsisissatut siunnersuummi aalajangersakkat amerlanersaat konto pingaarnermut 10.13.11-mut, aktiaateqarluni ingerlatseqatigiiffimmut toqqaannartumik aningaasartuutitut tunngasumut, oqaasertaliussatut 2018-imi aningaasanut inatsimmut ilaatinneqareerput. Oqaasertaliussaq inatsisivimmik taarserneqarnissami tungaanut inatsimmi aalajangersakkatut, aningaasat ukiuanni ataasiakkaartuni atuuttutut isigineqassaaq. Tamannalu inatsimmi matumani siunertat ilagaat.

Taamaalillunilu inatsisissatut siunnersuummut matumunnga saqqummiussissummini siunnersuuteqartoq ima allappoq:

”Kalaallit Airports A/S taarsigassarsisussanngorpat, aningaasanut inatsimmi ukioq ataasikkaartumi inatsimmi tunngavissaqarnermit, inatsimmut immikkoortumut allanngortitsinissaq, pingaaruteqarpoq. Inatsisartut inatsisaat Kalaallit Airports A/S-ip suliaannut sinaakutissiivoq aammalu taarsigassarsititsisut aningaasaliinissaannut taannalu aqqutigalugu sapinngisamik pitsaanerpaanik taarsigassarsinermut atugassaqartitaanissamut pisariaqartunik qularnaarisussaalluni.

Siunnersuut ingerlatseqatigiiffiup aningaasalersuinerata tamarmiusup ilaatut, Kalaallit Airports A/S-imi nammineq aningaasaatinut tunngaviussaaq aammalu Namminersorlutik Oqartussat mittarfinnik nutaanik sanaartornermut qanittumi taamatullu ungasissumi aningaasalersuineranut peqataasinnaanannut ammaassilluni.”

Siunnersuut ingerlatseqatigiiffiup aningaasalersuinerata tamarmiusup ilaatut, Kalaallit Airports A/S-imi nammineq aningaasaatinut tunngaviussaaq aammalu Namminersorlutik Oqartussat mittarfinnik qanittumi taamatullu ungasissumi aningaasalersuineranut peqataasinnaa-

nerannut ammaassilluni. Taarsigassarsinissami atugassarititaasussat, qularnaveeqquusiissuteqarnernissamut piumasaqaatit imaluunniit suliariumannittussarsiuussinerup inernerisassai inatsisissatut siunnersuummi isummerfigineqanngillat. Naalakkersuisut kingorna taarsigassarsinermi atugassarititaasunik, qularnaveeqquusiinissamik piumasaqaatinik aammalu suliariumannittussarsiuussinerup inernerinik suliarinninnissaasa kiisalu qularnaveeqquusiinerup Aningaasaqarnermut Akileraartarnermullu Ataatsimiititaliamit suliarineqarnerata saniatigut sanaartornissap inaarutaasup tamatumalu aningaasalersornissaata isummerfigineqarnissaani apeqqutaavoq Inatsisartut siunnersuummik suliarinninnerat.

Kapitali 1:

Kapitali 1-imi allassimavoq Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu Kalaallit Airports A/S-imut killiliussatut piumasaqaatit Inatsisartut inatsisaanni aalajangersarneqartut. Taamaattumillu mittarfiit qanorpiaq sanaartorneqarnissaat, ingerlanneqarnissaat imaluunniit aningaasalersorneqarnissaat inatsisissatut siunnersuutikkut aalajangersarneqanngilaq, tassanili suliassanik taakkuninnga Kalaallit Airports A/S-ip isumaginninnissaani killiliussatut piumasaqaatit kisimik nalunaarneqarlutik. Siunnersuummi § 1-imi allassimasutut Ilulissani, Nuummi Qaqortumilu mittarfiit inatsisissatut siunnersuummi kisimik pineqarput. Tamatuma kingunerisaanik mittarfinnik allanik sananeq allamut atatillugu suliarineqartussaassaaq, taamaattumillu taakku maannakkut inatsisissatut siunnersuummi pineqanngillat.

Tamanna Ilulissani Nuummilu nunanit tamalaanit mittarfiit 2.200 meterit Qaqortumilu nunap immikkoortuani mittarfiup 1.500 meterip pilersarusiorneqarnissaasa aallartinneqarnissaannik Aningaasaqarnermut Akileraartarnermullu Ataatsimiititaliap november 2017-imi akuersissutiginninneranut naapertuuppoq.

Kapitali 1 naapertorlugu ingerlatseqatigiiffimmik aqutamik 100%-imik pigineqartumik Kalaallit Airport A/S pilersitsisinnaavoq, soorluttaaq Namminersorlutik Oqartussat piginnittutut ingerlatseqatigiiffinnik imaluunniit ingerlatseqatigiiffinnik suleqatigisanik 100%-imik pigineqartunik pilersitsisinnaasut. Taakku siunertaat tassaassaaq Kalaallit Airport A/S-ip suliassaasa assinginik isumaginninnissaq, taamaalillutillu suliassanik inatsisissatut siunnersuummi matumani pineqartunik isumaginnissallutik.

Kapitali 2:

Kapitali 2 kapitali 1-ip nangissutaatut isigineqarsinnaavoq. Aalajangersakakkut naqissuserneqarpoq Nuummi Ilulissanilu kiisalu Qaqortumi mittarfinnik Kalaallit Airports A/S sanaartortitsisuullunilu piginnittuussasoq. Tamanna aamma atuuppoq pisortat attaveqarnermut tunngatillugu nutaatut sanaartugaannut, mittarfiliorerup pisariaqalersitaannut aammalu pilersinneqartussaasimangikkaluartunut. Kiisalu tamanna aamma atuuppoq pisortat attaveqarnermut tunngatillugu piusunik pilersitseqqinnerannut allanngortiterinerannulluunnit, mittarfiliorerup nassatarisaanik ajoquserneqartunut pisariaqalersinneqartunulluunniit.

Kiisalu suliassat § 3, imm. 1-imi pineqartut (Qaqortumi mittarfimmut tunngatillugu) pisortat oqartussaasuinut allanut imaluunniit ingerlatseqatigiiffinnut Namminersorlutik Oqartussanit pigineqartunut tunniunneqarnissaannut, taamaalillutillu Kalaallit Airports A/S-imit isumagineqannginnissaannik, aalajangiinissamut Naalakkersuisut **kapitali 2-mi** piginnaatinneqarput. Tamatumani pissutaavoq Qaqortup mittarfia amigartooruteqartussatut naatsorsuutigineqarmat, taamaalillunilu niuernermit tunngaveqarluni sanaartorneqarsinnaananilu ingerlanneqarsinnaassanani. Taamaattoqassappat ingerlatseqatigiiffiup pilersinneqarnissaanut aningaasaliissutitigut tunngavissiisoqartariaqassaaq. Aammalu Qaqortumi nunap immikkoortuani mittarfissap sananissaanut ingerlannissaanullu aningaasaliissutitigut immikkut tunngavissiisoqartariaqassaaq.

Kapitali 3:

Kapitali 3 mittarfiit sananeqarnissaannut aningaasat qanoq pissarsiarineqarnissaannut tunngavoq. Tassani allassimavoq sananissamut aningaasartuutit Kalaallit Airports A/S-imit akilerneqassasut, taamaattoq takuuk § 3, imm. 2. Sananeranut aningaasartuutit nammineq aningaasaatit atorlugit kiisalu taarsigassarsinikkut aningaasalersorneqassapput.

2,1 mia. kr.-it tikillugit aningaasaliissuteqarnissamut Namminersorlutik Oqartussat piginnaatinneqarput. Aningaasat taakku Nuummi Ilulissanilu nunanit tamalaanit mittarfinnut aningaasalersuutissat ilaannut kiisalu Qaqortumi mittarfiup tamakkiisumik nammineq aningaasalersornissaanut atorneqassapput. Taamaalillunilu Qaqortumi mittarfiliornissamut aningaasanik taarsigassarsisoqassanngilaq. Tamatuma peqatigisaanik Namminersorlutik Oqartussat aningaasanik taakkuninnga aningaasaliissuteqarnissaminnik Kalaallit Airports A/S-imut taarsigassarsisitsisunut pituttuisumik uppersaanissamut Naalakkersuisut piginnaatinneqarput.

Kiisalu aningaasaliissutit 2,1 mia. kr.-inngornissaasa tungaannut Kalaallit Airports A/S-imi aktiatigut aningaasaatinik ataasiarlutik arlaleriarlutilluunniit qaffaanissamut Naalakkersuisut piginnaatinneqarput. Aammalu Namminersorlutik Oqartussat mittarfiutaasa, taakkunungalu ilanngullugit pigisat aalaakkaasut, teknikimut atortut taakkuluunniit ilaasa aallarniutit aningaasaliinissamut atorneqarnerisigut aktiatigut aningaasaatinik qaffaanissamut Naalakkersuisut piginnaatinneqarput. Mittarfinnut piusunut atatillugu isumaqatigiissutitigut pisussaaffiit Kalaallit Airports A/S-imik tiguneqassanngillat. Kiisalu nunami mingutsitsinerusinnaasumut, piffissaq tigusiffiusoq sioqqullugu pisimasumut, akisussaaffik Kalaallit Airports A/S-imit tiguneqassanngilaq.

Siuliani taaneqareersutut sanaartornermut aningaasartuutissanut aningaasalersuutissanik taarsigassarsinissaq pisariaqassaaq. Taamaattumillu Inatsisartut Aningaasaqarnermut Akilerartarnermullu Ataatsimiititaliaanit akuerineqarlutik taarsigassarsianut qularnaveeqqusinissamut Naalakkersuisut piginnaatinneqarput. Tulliullugu nunap karsianit taarsigassarsi-

nissamut, taakkualu Kalaallit Airports A/S-imut ingerlateqqillugit taarsigassarsiaritinnissaannut Naalakkersuisut piginnaatinneqarput. Qularnaveeqqusissutit aammalu ingerlateqqitatut taarsigassarsiaajunnartut Ilulissani Nuummilu nunanit tamalaanit mittarfiit aningaasalersornissannut taamaallaat tunngatitaapput.

Kapitali 4:

Kapitali 4 mittarfinnut neqerooruteqartitsinermi sanaartornermilu killiliussatut piumasaqaatinut, sanaartornermi sulisunut nunanit allaneersunut sanaartornermut atatillugu atorneqartunut piumasaqaatigineqartunut tunngavoq.

Kapitali 5:

Kalaallit Airports A/S-ip ingerlatseqatigiiffimmut maleruaqqusat naapertorlugit suliaqarnini ingerlatissagaa aammalu suliaqarneq tamarmiusoq niuernermik tunngaveqartumik ingerlanneqassasoq **kapitali 5-imi** aalajangersarneqarpoq. Kiisalu niuerfiusut imaluunniit atuuffiit Kalaallit Airports A/S-ip allamut suliakkiutigisinnaavai.

Mittarfiit atorneqarnerinut akit Kalaallit Airports A/S-ip nammineq aalajangersassavai. Akilli akinullu tunngaviusut Naalakkersuisunit akuerineqartassapput. Ingerlatseqatigiiffiup suliai tamarmiusut tunngavigalugit aammalu ingerlatseqatigiiffiup najoqqutassiai aammalu ingerlatseqatigiiffimmik ingerlatsineranut tunngavissat naapertorlugit akit aalajangersarneqartassapput.

Kapitali 6:

Pisortat attaveqarnermut tunngatillugu sanaartugassaannut, Nuummi aamma Ilulissani nunanit tamalaanit mittarfinnik kiisalu Qaqortumi nunap immikkoortuani mittarfimmik sanaartornerup pisariaqalersitaanut aningaasartuutit akilernerqarnissaat pillugu Naalakkersuisut kommuninut isumaqatigiissusiorsinnaassasut **kapitali 6-imi** siunnersuutigineqarpoq.

Taamatuttaaq attaveqarnermut tunngasut pingaarutillit pisortanit ingerlanneqartut Nuummi, Ilulissani aamma Qaqortumi mittarfinnik sananermut atatillugu ajoquserneqartut pisariaqalersulluunniit pilerseqqinneqarnissaannut allanngortinneqarnissaannulluunniit aningaasartuutit agguarneqarnissaat pillugu Naalakkersuisut Kalaallit Airport A/S-imut isumaqatigiissusiorsinnaapput.

Kiisalu pilersaarusernermi tunngaviit ersarlunnerat imaluunniit isumaqatigiinnngissutigineqarnerat pissutigalugu Nuummi Ilulissanilu nunanit tamalaanit mittarfiit imaluunniit Qaqortumi nunap immikkoortuani mittarfiup sananeqarnerisa pisariaqanngitsumik kinguaattoorfiunnginnissaat, tak. kap. 2, aammalu mittarfinnik sananissami pilersaarusernermi tunngaviup qulakkeerinniffigineqarnissaani Naalakkersuisut oqartussaanerata nalornissutigineqarsinnaannginnissaa qulakkeerneqarpoq.

Kapitali 7:

Kapitali 7-mi aalajangersagaq pinngitsaaliissummik taarsiissutitalimmik arsaarinnittarnermut tunngavoq aammalu pilersaarusiortarnermut inatsisip qanoq paasineqarnissaa pillugu nalornissuteqartoqaleqqunagu ilanngunneqarluni. Taamaalillunilu ilaatigut kinguaattoortoqarnissaa pinngitsoortinniarlugu pinngitsaaliissummik taarsiissutitalimmik arsaarinninnissamut inatsisitigut tunngaviup apeqquserneqarsinnaanginnissaa siunnersuuteqartumit aalajangiisuusutut isigineqarpoq.

Kapitali 8:

Kalaallit Airports A/S-ip mittarfinnik sanaartornissamut atortussat imaatigut nassiussatut assartugassat pillugit assartuisartunut kikkunnulluunniit, tassungalu ilanngullugu Royal Arctic Linemut, neqeroortitsinnaanissaa **kapitali 8-mi** aalajangersakkakut qulakkeerneqarpoq. Tamatumani usinik imaatigut assartuineq pillugu Inatsisartut peqqussutaat atuutinngilaq.

Kapitali 9:

Kapitali 9-mi aalajangersakkakut qulakkeerneqarpoq Kalaallit Airports A/S-ip Pisortanut naqissusiinermut akitsuummik akiliuteqartinneqanginnissaa. Ingerlatseqatigiiffik Namminersorlutik Oqartussanit pigineqarmat naqissusiinermut akitsuummik 31,5 mio. kr.-inik akiliinissaanik piunasaqarneq ingerlatseqatigiiffiup akiliisinnaassuseqarnissamut upalungaarsimaneranut naapertuutissanngitsoq siunnersuuteqartoq isumaqarpoq.

2. Tusarniaanermut akissutit

Tusarniaanermut akissuteqarnissaq 19. februar 2018-mut killilerlugu siunnersuut ulloq 15. januar 2018 www.naalakkersuisut.gl -imi tusarniaavik aqqutigalugu tamanut saqqummiunneqarpoq siunnersuullu Naalakkersuisuoqarfinnut qulinut, KANUKOKA-mut, kommuninut, KANUNUPE-mut, SIK-mut, Sulisitsisunut, Mittarfeqarfinnut, Nukissiorfinnut, Royal Arctic Line A/S-imut, Asiamut, Grønlandsbanken A/S-imut, BankNordik A/S-imut aamma Visit Greenland A/S-imut tusarniaassutigineqarpoq.

Tusarniaanermut killiliussap naanerani ukuninnga tusarniaanermut akissuteqaat tiguneqarpoq:

Aningaasaqarnermut Akileraartarnermullu Naalakkersuisoqarfik kiisalu Inuussutissarsiornermut, Suliffeqarnermut, Niuernermit Nukissiuuteqarnermullu Naalakkersuisoqarfik oqaaseqaateqarsimapput. Tusarniaanermut akissutit oqaaseqaatitaqanngitsut ukuninnga tiguneqarsimasut paasissutissiissutigineqarpoq: Pinngortitamut Avatangiisinullu Naalakkersuisoqarfik, Aatsitassanut Naalakkersuisoqarfik aammalu Aalisarnermut Piniarnermullu Naalakkersuisoqarfik.

Taakku saniatigut Qeqqata Kommunianit, Kommuneqarfik Sermersuumit, Kommune Kujallermit, Sulisitsisunit, Mittarfeqarfinnit, Grønlandsbanken A/S-imit aamma Kalaallit Airports A/S-imit tusarniaanermut akissutit tiguneqarput.

Ataatsimiititaliap siunnersuummik suliarinninneranut atatillugu tusarniaanermut akissutit tiguneqartut Ineqarnermut Attaveqarnermullu Naalakkersuisunit saqqummiunneqarput. **(Takuuk ilanngussaq 2)**

3. Siunnersuutip Inatsisartunit siullermeerneqarnera

Siunnersuut ulloq 28. maj 2018-imi siullermeerneqarami tunngaviummik tapersorsorneqarpoq. Tamanna tunngavigalugu aammalu siunnersuutip erseqqinnerusumik nalilersorneqarnissaa siunertaralugu siunnersuut Aningaasaqarnermut Akileraartarnermullu Ataatsimiititaliamit suliarineqartussanngorlugu innersuunneqarpoq. Siunnersuummik siullermeerinninnermi arlalinnik apeqquteqartoqarmat Naalakkersuisunit imaaliallaannaq akineqarsinnaanngitsunik ataatsimiititaliamit oqaatigineqassaaq. Apeqqutitut taakkununga allakkatigut akissutit ataatsimiititaliamit tiguneqarput. Akissut **ilanngussatut 1-itut** ilanngunneqarpoq. Immikkoortulli ataasiakkaat erseqqinnerusumik paasinarsisinneqarnissaat ujartorneqarpoq. Tamatumani pineqarput siunnersuummut tunuliaqutaasoq, siunnersuutip aningaasaqarnermut timmisartuussisarnerullu aaqquissuusaaneranut - tassungalu ilanngullugu timmisartuussisarnermi akuusunut minnerunngitsumillu Kangerlussuarmut Narsarsuarmullu kingunerisassai kiisalu naalakkersuisooqatigiit siunnersuummut tapersorsuinerannut tunngasumik apeqqut. Kiisalu apeqqutit ilaat suliarinninnerup ingerlaqqinnerani imaluunniit inuiaqatigiit aningaasaataasa qanoq pingaarnersiorlugit atorneqartariaqarnerannik naalakkersuinikkut oqallinnermi aatsaat akineqarsinnaapput.

4. Siunersuineq Naalakkersuisunillu ataatsimeeqateqarneq

Naalakkersuisoq suliaasaqarfimmut akisussaasuusoq ataatsimiititaliamit arlaleriarluni siunersiorneqarpoq. Siunersuinerit ataatsimiititaliap nalinginnaasumik ataatsimiinneranut atatillugit ingerlanneqarput.

Naalakkersuisut siulittaasuannik siunersuineq pivoq sisamanngornermi ulloq 6. september **(takuuk ilanngussaq 2)**. Suliami malinnaatinneqarnissamik ataatsimiititaliap kissaataa aammalu nutaanik mittarfiliornissap aningaasalersorneqarnissaani danskit peqataasinnaanerat pillugu Naalakkersuisut statsministerimik oqaloqateqarnerata ingerlaqqinnerani Naalakkersuisut naatsorsuutigisaat siunersuineri qulequtarineqarput.

Statsministerimik isumaqatiginninnerup naammassinissaa sioqqullugu 10. september, nal. 11.30 siunersuuinissamut Naalakkersuisut Siulittaasuut Aningaasaqarnermut Akileraartarnermullu Ataatsimiititaliamit aggersarneqarpoq **(takuuk ilanngussaq 2)**. Ataatsimiititaliamit kalerrisaarutigineqartutut piffissaliussami siunersiorneqarnissamut periarfissaqarnani Naalakkersuisut Siulittaasuata paasissutissiissutigaa. Nalinginnaasumik piffissaliunneqartartumit sivikinnerungaartumik piffissaqartitsilluni siunersuuinissamut aggeqqusineq pisoq ataatsimiititaliap ilisimaaraa. Tamatumunngali tunngaviuvoq isumaqatigiissutip ulloq taanna Naalakkersuisut Siulittaasuannit Statsministerimillu atsiorneqartussatut naatsorsuutigineqartup imarisaanik paasitinneqarnissaq ataatsimiititaliamit kissaatigineqarmat.

Isumaqatigiissutissatut missingiusiap atsiorneqannginnerani ataatsimiititaliamit takuneqaqqaarnissaa siunniussat pillugit isumaqatigiissuteqarnissamut atatillugu ataatsimiititaliap Naalackersuisut Siulittaasuannut ersarissumik nalunaarutigaa. Tamanna Naalackersuisut Siulittaasuannit malinneqanngilaq.

Kiisalu inatsisissatut suinnersuutip ilusiligaanerani nassuiaateqaqqullugit Naalackersuisut ataatsimiititaliamit qinnuigineqarput. Inatsisip ilusiligaanerani nassuiaaneq ulloq 27. juni 2018-imi ingerlanneqarpoq. Tamatumani siunertarinqarluni siunnersuutip immikkoortuisa ataasiakkaat sukumiisumik paasisaqarfiginissaasa qulakkeerneqarnissaa. Tassunga atatillugu allakkatigut akisassanik ataatsimiititaliaq allakkatigut apeqqutteqarpoq. **(Takuuk ilanngusaq 2)**

Kiisalu siunnersuutip aningaasaqarnikkut kingunerisassaasa, tassungalu ilanngullugu ”Mittarfiit annertusaavigineqarneranni inuiaqatigiit aningaasaqarnerannut sunniutaasussanik nalilersuineq, Alloriarneq 2”-p nassuiaatigineqarnissaannik Naalackersuisut ataatsimiititaliamit qinnuigineqarput. Taanna ulloq 6. august 2018-imi ingerlanneqarpoq. **(Takuuk ilanngusaq 3)**.

Aammalu mittarfiit takissuserisinnaasaattut periarfissat allat, tassungalu ilanngullugu mittarfiit 1.199 meterinik takissuseqarsinnaanerisa inuiaqatigiit aningaasaqarnerannut kingunerisinaasai Deloittemit ataatsimiititaliamut nassuiaatigineqarput. Taanna ulloq 6. august 2018-imi ingerlanneqarpoq. **(Takuuk ilanngusaq 3)**.

Naalackersuisut allannguutissatut siunnersuutaata ilusiligaanikkut nassuiaatigineqarnissaa ataatsimiititaliap Naalackersuisunut qinnutigaa. Inatsisissap ilusiligaanerani nassuiaaneq ulloq 11. oktober 2018-imi ingerlanneqarpoq. Tamatumani siunertarinqarluni siunnersuutip immikkoortuisa ataasiakkaat sukumiisumik paasisaqarfiginissaasa qulakkeerneqarnissaa. Tassunga atatillugu allakkatigut akisassanik ataatsimiititaliaq allakkatigut apeqqutteqarpoq. **(Takuuk ilanngusaq 4)**.

Aammalu Naalackersuisut allannguutissatut siunnersuutaata inuiaqatigiit aningaasaqarnerannut kingunerisinaasai Deloittemit ataatsimiititaliamut nassuiaatigineqarput. Tamanna ulloq 19. oktober 2018-imi ingerlanneqarpoq. **(Takuuk ilanngusaq 5)**.

Kiisalu ingerlatseqatigiiffiup niuernermit aningaasaqarnermullu pilersaarutaa ataatsimiititaliamut Kalaallit Airports A/S-imit nassuiaatiginneqarpoq. Taanna nipangiusimassasatut suliarineqarpoq.

5. Ataatsimiititaliamut sassartut

Naalackersuisut arlaleriarluni ataatsimeeqatigineqarnerisa siunersiorneqarnerisalu saniatigut tusarniaaffigineqartunik assigiinngitsunik soqutigisaqartunillu allanik ataatsimiititaliaq arlaleriarluni ataatsimeeqateqarpoq, taakkunungalu ilaapput Qeqqata Kommunia, Kommuneqarfik Sermersooq, Avannaata Kommunia, SIK aamma Air Greenland. Assigiinngitsunik

pissuteqartumik Kommune Qeqertaliup aamma Kommune Kujalliuup sassartinneqarnissaat angumerineqangitsoorpoq.

6. Ataatsimiititaliap siunnersuummik suliarinninnera

Qulequttanut apeqqutinulluunniit siullermeerinninnermi saqqummiunneqartunut akissutit ataatsimiititaliamit tiguneqarput. Siunnersuut pillugu siullermeertumik ataatsimiinnermini ataatsimiititaliaq aalajangerpoq siunnersuut pillugu Naalakkersuisunut amerlasuunik apeqquteqarniarluni aammalu tamatuma kingorna ilassutitut apeqqutinik malitseqartitsilluni. Ataatsimiititaliap apeqqutai Naalakkersuisullu akissutaat isumaliutissiissummut matumunnga **ilanngussaq 6-itut ilanngunneqarput.**

Apeqqutit akissutillu ataatsimiititaliap siunnersuummik matuma kinguliani samminninnerani pisariaqarnerat naapertorlugu tikiqqartassapput. Paasinarluaqqullugu siunnersuut kapitalikkaartumik ataatsimiititaliamit sammineqassaaq.

Kapitali 1 pillugu:

Kapitali 1-ip qulequtaraa; “siunertaq aamma aaqqissuussaaneq”. Siunertaavoq Nuummi Ilulissanilu nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, aningaasalersorneqarnissaannut ingerlanneqarnissaannullu Kalaallit Airports A/S-imut sinaakktissatut piunasaqaatit aalajangersarneqarnissaat. Kalaallit Airports A/S-ip suliaassaraa sinaakktissatut piunasaqaatit taakku immersornissaat. Kiisalu aalajangersarneqarpoq inatsisissatut siunnersuummi Ilulissani, Nuummi Qaqortumilu mittarfiit kisimik pineqartut.

Pisariaqartinneqassappat aqutatut ingerlatseqatigiiffimmik 100%-imik pigineqartumik Kalaallit Airport A/S pilersitsisinnaavoq, soorluttaaq Namminersorlutik Oqartussat piginnittutut ingerlatseqatigiiffinnik imaluunniit ingerlatseqatigiiffinnik suleqatigisanik 100%-imik pigineqartunik pilersitsisinnaasut. Taakku siunertaat tassaassaaq Kalaallit Airport A/S-ip suliaassaasa assingunik isumaginninnissaq, taamaalillutillu suliaassanik inatsisissatut siunnersuummi matumani pineqartunik isumaginnissallutik.

Siunniussat pillugit Statsministerimut isumaqatigiissut pillugu:

Mittarfinnik nutaanik sanaartornissap aningaasalersorneqarnissaani danskit peqataasinnaanerannik Statsministerip oqaloqatigineqarnera pillugu Naalakkersuisut siulittaasuata ilisimatitsissutaanik isertuussassamik Aningaasaqarnermut Akileraartarnermullu Ataatsimiititaliaq ulloq 16. juli 2018-imi tigusaqarpoq. Mittarfiliornissat pillugit Naalakkersuisut inatsisissatut siunnersuutaata Inatsisartunit UKA 2018-imi naammassillugu suliarineqarnissaa sioqqullugu suleqatigiissitap sulinera naammassiniarneqassasoq ilisimatitsissummi oqaatigineqarpoq.

Suliaq taanna mittarfiliornissanut, taamaalillunilu mittarfiliassat pillugit Aningaasaqarnermut Akileraartarnermullu Ataatsimiititaliap isumaliutissiissusiorluni sulineranut assut pingaarteqarsinnaasutut ataatsimiititaliamit nalilerneqarpoq.

Taamaattumillu Aningaasaqarnermut Akileraartarnermullu Ataatsimiititaliamit siunersiorneqarnissamut Naalakkersuisut siulittaasuat ataatsimiititaliamit sisamangornermi ulloq 6. september 2018-imi aggersarneqarpoq. Ajoraluartumik siunersiorneqarnermini Naalakkersuisut siulittaasuat ataatsimiititaliamut annertunerusumik nassuiaasinnaasimangilaq.

Tamatuma kingorna ulloq 10. september isumaqatigiittoqarsimanagera pillugu Naalakkersuisut siulittaasuata ilisimatitsissutaanik Aningaasaqarnermut Akileraartarnermullu Ataatsimiititaliaq tigusaqarpoq. Siunniussat pillugit isumaqatigiissut isumaliutissiisummut uunga ilanngussatut ilanngunneqarpoq. Tassani allassimavoq siunniussat pillugit isumaqatigiissut Folketingimit Inatsisartunillu akuerineqarsimatinnani pituttuisuungitsoq. Kiisalu siunniussat pillugit isumaqatigiissut Folketingimi suli akuersissutigineqanngitsoq ataatsimiititaliamit maluginiarneqarpoq. (**Takuuk ilanngusaaq 7**).

Siunniussat pillugit isumaqatigiissut marlunnik imaqarpoq. Siulleq danskit mittarfiliornissami akuunissaannut tunngassuteqarpoq aappaalu Kalaallit Nunaata Danmarkillu inuussutisarsiornikkut suleqatigiinnerannik nukittorsaanissamik. Mittarfiliornissanut naalagaaffiup akuunissaa inatsisissatut siunnersuummut matumunnga tunngatillugu kisimi attuumassuteqarpoq.

Tamatuma peqatigisaanik isumaqatigiissummi allassimavoq siunniussat pillugit isumaqatigiissutip imarisai arlallit kalaallit danskillu oqartussaasuinit qulaajarneqaqqaartariaqarnerat illuatungeriinnit isumaqatigiissutigineqartoq.

Tamatuma saniatigut siunniussat pillugit isumaqatigiissummi allassimavoq pisuni aalajangersimasuni assersuutigalugu Kalaallit Airports A/S-imi piginneqataassuteqartut piginnaatitaaffiit pillugit piginnittunut erseqqinnerusumik isumaqatigiissusiortoqassasoq. Pissutsit aalajangersimasut taakku pillugit suli isumaqatigiissusiortoqarsimangitsoq ataatsimiititaliamit maluginiarneqarpoq.

Piginneqataasutut pisinnaatitaaffiit ilanngullugit piginnittuunermut isumaqatigiissut atuut-tunngortinneqarpoq, taanna pingaarnertut makkuninnga aalajangersakkanik imaqarpoq: Niuernermi piumasaqaatit ilannguttussaanginnerlu pillugu tunngavigisaq naapertorlugit (i) piginnittuunermut tunngaviit, (ii) itigartitsisinnaatitaaneq, (iii) aqutsisut katitigaanerat, (iv) iluanaarutissatut naatsorsuutigisinnaasat, (v) piginneqataassutsit aqutsisullu katitigaanerisa allannronerat, (vi) paasissutissat ingerlaarnerat, (vii) saqitsaannernik aaqqiissuteqarneq, (viii) susassaqaatit allallu akornanni pissutsit.

Piginnittuuneq pillugu isumaqatigiissummut atatillugu pissutsit allat Naalakkersuisut Siulittaasuata finansministerillu akornanni isumaqatigiissutigineqassapput.

Isumaqatigiissummi siuliani taaneqartumi ilaatigut allassimavoq:

”Suliniutip aningaasaqarnerata aalajaannerunissaa siunertaralugu naalagaaffik nammineq aningaasaatiminik tapiissuteqarniarput aamma Kalaallit Airports A/S-illu ingerlatteqatigiiffiata Nuummi Ilulissanilu mittarfinnik ingerlatsinissaanut sanaartortitsinissaanullu erniakitsunik taarsigassarsinissamut qulakkeerinneqataassaaq. Taamaaliornikkut taarsigassanut aningaasalersuisariaqarneq annikillineqassaaq, ernianullu aningaasartuutit annikillillutik. Peqatigisaanilu Namminersorlutik Oqartussanut aningaasaqarnikkut ernumanartukinnerulerpoq.”

Inatsisissatut siunnersuummi kapitali 1-mut Naalakkersuisut allannguutissatut siunnersuutaat:

Statsministerimut isumaqatigiissutip malitsigisaatut inatsisissatut siunnersuummut matumunga allannguutissatut siunnersuummik Naalakkersuisut ulloq 27. september saqqummiussipput. § 1-imut, § 6-imut, § 11-mut, § 20-mut aamma § 21-mut allannguutissatut siunnersuutininik saqqummiussisoqarpoq.

§ 1, imm. 2 ima oqaasertalerneqassasoq Naalakkersuisut siunnersuutigaat:

”Imm. 2. Kalaallit Airports A/S-ip suliassat imm. 1-imi pineqartunut ilaasut ingerlatseqatigiiffinni immikkoortorta qarfiusuni ataatsimi arlalinniluunniit isumagisinnaavai. Namminersorlutik Oqartussat suliassat imm. 1-imi pineqartunut ilaasut isumagineqarnissaannut ingerlatseqatigiiffinnik piginnittunik imaluunniit ingerlatseqatigiiffinnik suleqatigisanik pisariaqartunik 100 %-imik pigineqartunik pilersitsisinnaapput.”

Oqaasertaliinerup allanngortinneqarnerani ilaatigut Kalallit Airports A/S-imi Nuummi aamma Ilulissani nunanit tamalaanit mittarfiit sanaartorneqarnissaannut ingerlanneqarnissaanullu ingerlatseqatigiiffiit immikkoortorta qarfiusut arlalinnik piginnittoqarsinnaanerat periarfissiissutigineqassaaq, tassanilu ilaavoq naalagaaffik.

Kalaallit Airports A/S-imi Nuummi aamma Ilulissani nunanit tamalaanit mittarfiit sanaartorneqarnissaannut ingerlanneqarnissaanullu ingerlatseqatigiiffimmut immikkoortorta qarfiusumut aammalu Qaqortumi nunap immikkoortuani mittarfiup sanaartorneqarnissaanut ingerlanneqarnissaanullu ingerlatseqatigiiffimmut immikkoortorta qarfiusumut ingerlatseqatigiiffittut qullersaqarfiusut/ingerlatseqatigiiffittut piginnittuusutut aqqissuunneqarsinnaavoq. Ingerlatseqatigiiffik immikkoortorta qarfiusooq aktiaatilinnit arlalinnit pigineqartuusinnaavoq.

Kiisalu § 1, imm. 3 ima oqaasertalerneqassasoq Naalakkersuisut siunnersuutigaat:

” Imm. 3. Inatsimmi aalajangersakkani allani Kalaallit Airports A/S-imi taamatuttaaq suliassat imm. 1-imi pineqartunut ilaasut isumagineqarnissaannut ingerlatseqatigiiffiit immikkoortorta qarfiit piusinnaasut pineqartunut ilaapput.”

Aalajangersagaq taanna malitsitit iluarsinertut ataatsimiititaliamit isigineqarpoq.

Siunnersuut una malillugu Namminersorlutik Oqartussat Kalaallit Airports A/S-imut aningaasannorlugit 2,1 mia. kr.-it tikillugit aktianut taarsigassarsianullu akisussaaffeqarfiusunut aningaasaliissapput. Aalajangersagaq taanna aalajangiusimaneqarpoq.

Allannguutissatut siunnersuut naapertorlugu naalagaaffik Kalaallit Airports A/S-ip ingerlatseqatigiiffittut aqutaanut, Nuummi Ilulissanilu mittarfinnik sanaartortussamut ingerlatsissamullu, 700 mio. kr.-inik aningaasaliissuteqassaaq. Aningaasaliissutit tamarmiusut taakku pingajorarterutigaat (1/3). Tamatuma kingunerisussaassavaa ingerlatseqatigiiffimmut aqutamut tassunga Kalaallit Airports A/S-ip aktiatigut aningaasaatitut 1,4 mia. kr.-inik aningaasaliissuteqartariaqarnera. Ataatsimiititaliap paasivaa ingerlatseqatigiiffimmik aqutamik allamik, Qaqortumi mittarfimmik sanaartorlunilu ingerlatsissamuk, Kalaallit Airports A/S pilersitsissasoq aammalu mittarfik Namminersorlutik Oqartussanit tamakkiisumik aningaasaliiffigineqassasoq.

Naalagaaffiup nammineq aningaasaatinut aningaasaliissuteqarsinnaanera immikkut isigigaanni avataaneersut allat aningaasaliissuteqarnissaannik pisariaqartitsinermut annikillisaataassaaq. Allamik allanngortoqanngippat tamatuma kingunerissavaa taarsigassarsiasatut pisariaqartitat 700 mio. kr.-inik ikileriarnerat. Tamanna aningaasaliissutinut ukiumoortumik aningaasartuutissani annertuumik sipaaruteqarnermik kinguneqassasoq ataatsimiititaliamit maluginiarneqarpoq. Allannguutissatut siunnersuummi paasissutissiisutigineqarpoq:

”Sunniinerit imminnut akerleriittut taakkua ataatsimoortillugit kingunerisaannik, inuiaqatigiit aningaasaqarneranni ilanngaaseereermermi iluanaarutissat 339 mio. koruuninik amerlissapput. Tamanna Namminersorlutik Oqartussanut pissariarititassat naatsorsuineri ilanngunneqartut 145 mio. koruuninik annikillinerisa inerneraat, aningaasalersuineri aningaasartuutini sipaaruteqarnerup malitsigisaanik inuiaqatigiit iluanaaruteqassallutik. Taakkua atuisut akiliutaasa appartinnissaannut atorineqassapput, tamannalu maannakkut naliusumi 484 mio. koruuninik inuiaqatigiit aningaasaqarneranni pitsaasumik sunniissaaq.”

Kalaallit Nunaannit isigalugu aarlerinaataasut isumaqatigiissutip malitsigisaanik allanngussapput, tassa Naalakkersuisut Nuuk aamma Ilulissat pillugit mittarfinnut aningaasaliinernut tunngatillugu aarlerinaataasuni danskit naalakkersuisui avitseqatigisussanngussammasigit, Qaqortumut tunngatillugu aarlerinaataasut Naalakkersuisuniiginnassallutik.

Allannguutissatut siunnersuummi Kalaallit Airports A/S-imi Nuummi aamma Ilulissani nunanit tamalaanit mittarfiit sanaartorneqarnissaannut ingerlanneqarnissaannullu ingerlatseqatigiiffimmi immikkoortotaqarfiusumi nammineq aningaasaatitut naalagaaffiup 0,7 mia. koruuninik akiliuteqarneranut atasumik ingerlatseqatigiiffinnut inatsisitigut aalajangiinerit pisariaqartut ingerlannissaannut Naalakkersuisut piginnaatinneqarput.

Allanguutissatut siunnersuummi ilanngullugu Kalaallit Airports A/S-imi Nuummi aamma Ilulissani nunanit tamalaanit mittarfiit sanaartorneqarnissaannut ingerlanneqarnissaannullu ingerlatseqatigiiffimmi immikkoortotaqarfiusumi aktiaatillit pisinnaatitaaffii pillugit danskit naalakkersuisuinut piginnittut isumaqatigiissutaannik isumaqatigiissuteqarnissamut Naalakkersuisut piginnaatinnearput. Naalakkersuisut aamma danskit naalakkersuisuisa akornanni isumaqatigiissut, Kalaallit Airports A/S-ip ingerlatseqatigiiffiit qullersaqarfiattut aammalu danskit aningaasaqarnermut ministeriata akornanni piginnittut isumaqatigiissuteqarnerattut, pisortatigoortumik atuutsinneqalissaaq.

Kapitali 2 pillugu:

Nummi Ilulissanilu kiisalu Qaqortumi mittarfinnik sanaartornermi ingerlatsinermilu Kalaallit Airports A/S sanaartortitsisuullunilu piginnittuussasoq aalajangersakkakut aalajangersarneqarpoq.

Qaqortumi nunap immikkoortuani mittarfimmik sanaartornerup, piginnittuunerup ingerlatsinerullu aammalu tassunga atatillugu aningaasartuutit pisortani oqartussaasumut imaluunniit ingerlatseqatigiiffimmut Namminersorlutik Oqartussanit pigineqartumut tunniunneqarsinnaanerannik Naalakkersuisut aalajangiinissaannut kapitali 2-mi periarfissiisoqarpoq. Ataatsimiititaliap paasinninnera malillugu mittarfimmik sanaartornermut taarsigassarsinermut aningaasartuutaajunnartut matussuserneqareneranni Qaqortumi mittarfiup imminut akilersinnaanissaata naatsorsuutigineqannginnera aalajangersakkamut tassunga tunuliaqutaavoq. Taamaassimappat Kalaallit Airports A/S-ip ingerlataasa imminut akilersinnaasuunissaannik piumasqaammut tamatuma naapertuutinnginneranik Naalakkersuisut ataatsimiititaliamit isumaqatigineqarput.

Inatsisissatut siunnersuummi kapitali 2-mut Naalakkersuisut allanguutissatut siunnersuutaat:

Naalakkersuisut allanguutissatut siunnersuutaanni inatsisissatut siunnersuummi kapitali 2-mi aalajangersakkat immikkut tikinneqanngillat. Naalakkersuisulli siunnersuutip ilusiligaa-neranik saqqummiussineranni allassimavoq Kalaallit Airports A/S-ip ingerlatseqatigiiffiata aqutap 2-p Qaqortumi mittarfimmi ingerlatat isumagissagai.

Suliassat siunnersuummi § 3, imm. 1-imi ilaatinneqartut tamakkiisumik aningaasalersorneqarnissaat qulakkeerneqaaqqullugu aningaasat Kalaallit Airports A/S-imut aningaasaliisutigineqartut suliffeqarfimmut ingerlatseqatigiiffimmulluunniit Qaqortumi mittarfimmik tiguisissamut nuunneqarnissaat pissusissamisoortutut ataatsimiititaliamit isigineqarpoq.

Kapitali 3 pillugu:

Kapitali 3 mittarfiit sananeqarnissaannut aningaasat qanoq pissarsiarineqarnissaannut tunngavoq. Tassani allassimavoq sananissamut aningaasartuutit Kalaallit Airports A/S-imit akilerneqassasut, taamaattoq takuuk § 3, imm. 2. Sananeranut aningaasartuutit nammineq aningaasaatit atorlugit kiisalu taarsigassarsinikkut aningaasalersorneqassapput.

Aningaasaliineq aammalu aktianut aningaasaatinik taarsiagassarsianillu akisussaaffeqarfiusunik taarsigassarsianik qaffaaneq § 5-6-imi tikinneqarput, § 7-imi Kalaallit Airports A/S-ip taarsigassarsiaanut qulanaveeqqusiinissamut, tulliullugulu Kalaallit Airports A/S-imut ingerlateqqitassanik nunatta karsianit taarsigassarsinissamut Naalakkersuisunut piginnaatitsissut tikinneqarpoq. Pisuni pineqartuni marlunni qulanaveeqqusiinerup nunatta karsianilluunniit taarsigassarsinerup angissusia piumasaqaatillu Aningaasaqarnermut Akileraartarnermullu Ataatsimiititaliamut akuerisassanngorlugit saqqummiunneqassapput.

Nammineerluni aningaasaatinut tapersiissutit ilaatigut Siunissamut Ungasissumut Aningaasaliissutissanut Aningaasaateqarfimmi uninngasuutit atorlugit aningaasaliinikkut aningaasalersorneqassapput. Aningaasaateqarfiup siunertaraa aningaasaateqarfiup aningaasaataasa siunissamut ungasissumut aningaasaqarnikkut eqqarsaatigisassanut aningaasaliissutigineqartarnissaat. Aningaasaateqarfiup aningaasaatasa aningaasaliissutigineqartarnerini siunissami ungasissumi toqqissisimanartumik isumannaassuseqarneq anguneqartassaaq, annertunerpaamik ilua-naaruteqartoqartassaaq aningaasaateqarfiullu aningaasaatai inuiaqatigiit aningaasaqarnerannut pitsaanerpaanik sunniuteqartassapput.

Tamatuma saniatigut nammineerluni aningaasaliissutinut tapersiissutit Namminersorlutik Oqartussat aalajangersimasunut isertitaat arlallit, Siunissamut Ungasissumut Aningaasaliissutissanut Aningaasaateqarfimmut ilaatinneqanngitsut aqqutigalugit aningaasalersorneqassapput. Isertitat taakku Kalaallit Airports A/S-imi aningaasaliisutitut atorneqarnissaannut AI 2018-imi konto pingaarnermut 10.13.11-mut oqaasertaliussakkut tunngavissiisoqarpoq.

Inatsisissatut siunnersuummi kapitali 3-mut Naalakkersuisut allannguutissatut siunnersuutaat:

Siunnersuutip matuma kapitalii pillugit ataatsimiititaliap suliarinnerata ataani matuma siulianiittumi Naalakkersuisut Siulittaasuata Statsministerillu siunniussat pillugit isumaqatigiissutaat ataatsimiititaliamit tikinneqarpoq. Siunniussat pillugit isumaqatigiissutip ilaa nammineq aningaasaatinut naalagaaffiup aningaasaliinissamik pilersaarutaanut, tamatumalu siunnersuummut matumunnga aammalu piginnittuunermut ingerlatseqatigiiffimmillu ilusiliinermut aalajangersakkanut kingunerisinnaasaanut tunngasoq ataatsimiititaliamit iserfigitsiarneqarpoq.

Nummi Ilulissanilu mittarfinnut imminut akilersinnaasunut siunniussat pillugit isumaqatigiissut tunngamat Qaqortumi tamakkiisumik aningaasalersuinissamut pilersaarutit tikinneqannginnerat ataatsimiititaliamit maluginiarneqarpoq.

§§-inut 4-5-inut imaluunniit § 7-imut allannguutissatut siunnersuummik saqqummiussisoqanngilaq. § 6-imut allannguutissatut siunnersuummik saqqummiussisoqarpoq. Tassani Ka-

laallit Airports A/S-imut aktianut aningaasaatit ataasarlugit arlaleriarlugilluunniit qaffan-neqarnissaannut Naalakkersuisunut piginnaatitsissut attatiinnarneqarpoq. Kiisalu § 6-imut allannguutissatut siunnersuut piginnaatitsissutinik marlunnik aamma siuliani taaneqartunik imaqarpoq.

Allannguutissatut siunnersuummi Kalaallit Airports A/S-imi Nuummi aamma Ilulissani nunanit tamalaanit mittarfiit sanaartorneqarnissaannut ingerlanneqarnissaannullu ingerlatseqatigiiffimmi immikkoortorta qarfiusumi nammineq aningaasaatitut naalagaaffiup 0,7 mia. koruuninik akiliuteqarneranut atasumik ingerlatseqatigiiffinnut inatsisitigut aalajangiinerit pisariaqartut ingerlannissaannut Naalakkersuisut piginnaatinneqarput.

Allannguutissatut siunnersuummi ilanngullugu Kalaallit Airports A/S-imi Nuummi aamma Ilulissani nunanit tamalaanit mittarfiit sanaartorneqarnissaannut ingerlanneqarnissaannullu ingerlatseqatigiiffimmi immikkoortorta qarfiusumi aktiaatillit pisinnaatitaaffii pillugit danskit naalakkersuisuinut piginnittut isumaqatigiissutaannik isumaqatigiissuteqarnissamut Naalakkersuisut piginnaatinneqarput. Naalakkersuisut aamma danskit naalakkersuisuisa akornanni siunniussat pillugit isumaqatigiissut, Kalaallit Airports A/S-ip ingerlatseqatigiiffiit qullersaqarfiattut aammalu danskit aningaasaqarnermut ministeriata akornanni piginnittut isumaqatigiissuteqarnerattut, pisortatigoortumik atuutsinneqalissaaq.

Imm. 3-mi 4-milu aalajangersagaasimasut § 01-imut nutaamut nuunneqarsimapput, taannalu kingusinnerusukkut § 7-inngorlugu allanngortinneqarpoq. Aallarniutitut akiliutit pillugit aalajangersagaq ima allanngortinneqarpoq; Nuummi Ilulissanilu mittarfiit piusut Kalaallit Airports A/S-ip ingerlatseqatigiiffianut aqutamut sanaartugassanngorlugit ingerlatassanngorlugillu tunniunneqarlutik. Tunniussineq isumaqatigiissuteqarnikkut aallarniutitulluunniit akiliuteqarnikkut pisinnaavoq. Tamanna Naalakkersuisut ima tungavilersorpaat:

”Nuuk aamma Ilulissat pillugit ingerlatseqatigiiffiup immikkoortorta qarfiusup pigineqarnera maannakkut Namminersorlutik Oqartussat aamma naalagaaffiup akornanni avinneqassaaq. Ingerlatseqatigiiffiup immikkoortorta qarfiusup nalinga aallarniutitut akiliuteqarnermut sunniissasoq naatsorsuutigineqarmat, tamanna piginnittuunerup agguarneqarneranut sunniuteqarsinnaavoq. Taamaattumik sanaartukkat pioreersut nalingisa tarsigassarsiarititatut tunniunneqarsinnaanerit maannakkut periarfissalerpoq, tassami tamanna naalagaaffiup piginneqataassutaanut sanilliullugu nammineqanigaasaatinut Namminersorlutik Oqartussat piginneqataassutaannik annertusititsi-sussaangimmat.”

Aallarniutitut akiliuteqarnikkut tunniussineq naalagaaffiup Kalaallit Airports A/S-illu ingerlatseqatigiiffimmi aqutami piginneqataassutaannik nikisitsissaaq, taamaalilluni naalagaaffiup piginneqataassutaa, mittarfiit qanoq nalitutigisutut nalilerneqarnerat apeqqutaalluni, pingajorarterummit annikinnerulissalluni. Taamaattumik nalingannik naliliineq, kukkunersiuisumit naalagaaffimmit akuerisaasumit ingerlanneqartussaaq, tunniussinermut atatillugu taarsigassarsisitsinermut isumaqatigiissummut tungaviussaaq. Taama iliornerup aningaasanut tigo-riaannarnut sunniutissaa taasaraqfigineqanngillat.

Kiisalu Nuummi Ilulissanilu mittarfinnik sananissamut ingerlatsinissamullu Kalaallit Aiports A/S-ip ingerlatseqatigiiffiutaata erniakitsunik taarsigassarsisinnaanerata qulakkeerneqarnissaanut naalagaaffiup peqataanissaa Statsministerimik siunniussat pillugit isumaqatigiissummi ilaatinneqarpoq. Naalagaaffiup aningaasaleeqataassutai 700 mio. kr.-it Namminersorlutik Oqartussat aningaasaliissutaannut 2,1 mia. kr.-inut ilanngunneqartussaammata, tamatuma kingunerissavaa taarsigassarsiarisassatut pisariaqartitat 700 mio. kr.-inik ikilinerat. Taamaattumillu taarsigassarsiarisassatut pisariaqartitat 1.6 mia. kr.-init 900 mio. kr.-inut ikileriassapput. Den Nordiske Investeringsbankimi aningaasalersuisarfimmiluunniit allami 450 mio. kr.-it tikillugit taarsigassarsianut Naalagaaffik qularnaveeqqusiissaaq. Kiisalu taarsigassarsinissamik isumaqatigiissummik eqquutsitsinngitsoqassagaluarpas nammineq aningaasaatinut nuunneqarsinnaatitaasussanik Naalagaaffik 450 mio. kr.-it tikillugit taarsigassarseeqqikkumavoq.

Tamanna immikkut isigalugu soorunami ingerlatseqatigiiffimmut aqutamut aningaasaqarnikkut assut sunniuteqassaaq. Inatsisissatut siunnersuummi § 7-imut allannguutissatut siunnersuummik saqqummiussisoqanngilaq, tamannalu ingerlatseqatigiiffimmut aqutamut Naalagaaffiup piginneqataaffigiligassaanut naalagaaffimmit qularnaveeqqusiisinnaaneq taarsigassarsisitseqqissinnaanerluunniit eqqarsaatigalugit pisariaqanngilaq.

”Kalaallit Airports A/S-imi naalagaaffiup nammineq aningaasaatinut akiliuteqarnerata aammalu taarsigassarsiasat qularnaveeqqusiigaasut kiisalu taarsigassarsititseqqinnerup malitsigisaannik ernianut akilersuutinullu sipaaruteqartoqassaaq, tamannalu Nuummi Ilulissanilu mittarfinni atuisut akiliuteqartinnissaasa annikillisissinnaassaanut, Kalaallit Airports A/S-imi pitsaasumik iluaqutaassaaq. Tamanna periarfissatut ilusiliani allani maannakkut naliusunut, taamaalillunilu inuiaqatigiit aningaasaqarneranni misissueqqissaarnerup inerneranut, pitsaasumik sunniuteqassaaq.”

Periarfissatut ilusiliaq aallaaviusoq aammalu Mittarfeqarfiup ataani attaveqarnermik maanna aqqissuussinerup attatiinnarneqarneranik nassataqartoq isumaqatigiissummit kalluarneqanngitsoq ataatsimiititaliamit ilimagineqartariaqarpoq. Akerlianilli periarfissatut ilusiliat 1-ip aamma 2-p inuiaqatigiit aningaasaqarnerannut kingunerisassaannik naliliinermut isumaqatigiisut siunnuteqanngitsoorsinnaanngilaq. Aammalu periarfissatut ilusiliat pillugit missingersuutit aningaasaqarnikkut misissuiffigeqqissaarneqarnerannut isumaqatigiisut siunnuteqanngitsoorsinnaanngilaq.

Kapitali 4 pillugu:

Kapitali 4 mittarfinnut neqerooruteqartitsinermi sanaartormilulu killiliussatut piumasaqaatinut, sanaartormi sulisunut nunanit allaneersunut sanaartormut atatillugu atorneqartunut piumasaqaatigineqartunut tunngavoq.

§ 8-mi aammalu § 9-mi aalajangersakkat 2018-imi aningaasanut inatsimmi konto pingaarnermut 10.13.11-mut oqaasertaliussamik nr. 5-imik, nunani tamalaani piumasaqaataasut naapertorlugit neqeroortitsisarnermut tunngasumik, ingerlatitseqqinneruvoq. Nunani tamalaani

neqerooruteqartitsinikkut, illuliortiternermi sanaartormilulu suliaqarpallaalernissaq annikillisinneqassasoq Naalakkersuisut isumaqarput. Aammalu mittarfiliassat kingunerisaannik sanaartugassat ima annertutigilissapput, allaat illuliornermi sanaartormilulu sulisartut, Kalaallit Nunaanni pissarsiarineqarsinnaasunit amerlanerusut pisariaqartinneqartussaallutik. § 10-mi aalajangersagaq nutaajuvoq sulinngiffeqarnermullu tunngasut maleruagassiuunneqarnerini angisuunik suliaqarnermut inatsit isumassarsiorfigineqarluni.

§ 11-mi aalajangersagaq nutaajuvoq peqqissutsimullu tunngasunut maleruagassiuussinerulluni. § 12-imi aalajangersagaq nutaajuvoq inatsimmilu ”illuliortiternermi sanaartormilulu sulisut nunanit allaneersut” qanoq paasineqassanersut nassuiarneqarluni. Kiisalu § 13-imi aalajangersagaq nutaajuvoq soraarnerussutisianullu tunngasut maleruagassiuunneqarnerannut tunngasuulluni. Aalajangersagaq allaffissornerujussuarmik annikillititsissasoq Naalakkersuisumit oqaatigineqarpoq.

Inatsisissatut siunnersuummi kapitali 4-mut Naalakkersuisut allannguutissatut siunnersuutaat:

§ 11-mut allannguutissatut siunnersuummik Naalakkersuisut saqqummiussipput. Kalaallit Airports A/S-ip neqeroortitsinissamut najoqqutassanut missingiutip suliarineqarneranut atattillugu § 11, imm. 1-imut siunnersuummi erseqqissaanissaq pisariaqartissimagaa Naalakkersuisut paasissutissiipput.

Illuliornermi sanaartormilulu sulisut, illuliornermik sanaartormernillu suliaqarnerni Inatsisartut inatsisaanni pineqartuni sulisorineqartut, peqqissutsikkut sullinneqarnerat pillugu siunnersuummi § 11-ip allanngortinneqarnissaa Naalakkersuisunit pissutissaqarsorineqarpoq. Siunnersuutigineqarpoq sillimmasiisoqassasoq, illuliornermi sanaartormilulu sulisorineqartut, peqqinnissaqarfiup sullississutai pillugit inatsisini sukkulluunniit atuuttuni akeqanngitsumik sullinneqarnissamut pisinnaatitaanngitsut, aallarunneqarnissaannut, assartorneqarnissaannut katsorsarneqarnissaannullu Kalaallit Nunaanni peqqinnissaqarfiup aningaasartuutaannik matussusiisussamik.

Kiisalu inatsisissatut siunnersuummi saqqummiunneqaqqaartumi § 11-mi peqqinnissamut tunngasut aalajangersakkat aalajangersimasut peerneqarput. Allannguutissatut siunnersuutip ilusiligaanerata ataatsimiititaliamut saqqummiunneqarnerani Naalakkersuisup ataatsimiititaliamut paasissutissiisutigaa: Tamanna pillugu aalajangersakkat peqqissutsimut suliaqarfirmi maleruagassanut tunngaviusuni ilanngunneqartariaqartut aammalu sanaartugassamut immikkuullarissumuinnaq pinnani, inunnut aamma suliffeqarfinnut attuumassuteqartunut tamaginnut atuuttariaqarlutik.

Siusinnerusukkut immikkut aalajangersakkat peqqissutsimut suliaqarfirmi inatsimmi naleqqunnerusumik iliuuseqarfigineqarsinnaasut Naalakkersuisut isumaqarput.

Kapitali 5 pillugu:

Kalaallit Airports A/S-ip ingerlatseqatigiiffimmut maleruaqqusat naapertorlugit suliaqarnini ingerlatissagaa aammalu suliaqarneq tamarmiusoq niuerneramik tunngaveqartumik ingerlanneqassasoq **kapitali 5-imi** aalajangersarneqarpoq. Kiisalu niuerfiusut imaluunniit atuuffiit Kalaallit Airports A/S-ip allamut suliakkiutigisinnaavai.

Mittarfiit atorneqarnerinut akiliniq Kalaallit Airports A/S nammineq aalajangersaassaaq. Akilli akinullu tunngaviusut Naalakkersuisunit akuerineqartassapput. Kalaallit Airports A/S-ip suliai tamarmiusut tunngavigalugit aammalu ingerlatseqatigiiffiup ingerlatseqatigiiffimik ingerlatsinissamut najoqutassai tunngaviilu naapertorlugit akit aalajangersarneqartassapput.

Suliassanik immikkut isigalugit niuerneramik tunngaveqarluni ingerlanneqarsinnaangitsunik isumaginninnissaminut Kalaallit Airports A/S periarfissinneqarpoq, suliaali tamarmiusut niuerneramik tunngavilimmik sinneqartoornissamillu anguniagaqarluni ingerlanneqassapput. Taamaalillunilu Qaqortumi mittarfimmik, niuerneramik tunngaveqanngitsumik, sanasussamik ingerlatsisussamillu ingerlatseqatigiiffimik aqutamik pilersitsinissamut aammalu Nuummi Ilulissanilu mittarfinnik, niuerneramik tunngaveqartumik ingerlanneqarsinnaasutut nalilerneqartunik, sananissamut ingerlatsinissamullu ingerlatseqatigiiffimik aqutamik allamik pilersitsinissamut Kalaallit Airports A/S § 14-imi aalajangersakkakut periarfissinneqarpoq.

§ 14-imi aamma § 15-imi aalajangersakkat imminnut ataqatigiissillugit isigineqassapput. Kalaallit Airports A/S-ip isertitaqarnissamut tunngavia pingaarneq § 15-imi aalajangersakkakut aalajangersarneqarpoq.

Aalajangersagaq akigititanut taamaallaat timmisartuutileqatigiiffiup mittarfimmik atuineranut tunngassuteqartunut, tunngasuvoq. Aalajangersakkami pineqarput assersuutigalugu aallarnermut minnermullu akigititat, uningannermut akigititaaq, ammaanermut akigititaaq, avatangiisinut akigititaaq kiisalu orsersornermut, iliuseqarnermut allaffissornermullu akiliut. Kisiannili aalajangersagaq Kalaallit Airports A/S-ip suliaanut allanut akinik aalajangersaanermut tunngassuteqanngilaq.

Naalakkersuisut akinut akinullu tunngaviusunut, siunnersuummi § 14 naapertorlugu aalajangersarneqartunut akuersinissaminnut itigartitsisinnaangillat. Akinik akinullu tunngaviusunik, ingerlatseqatigiiffiup soqutigisaannit allaanerusunik isumagisaqarnissaanik siunertaqarfiusunik imaluunniit malinneqartussanik akuersinissamut Naalakkersuisut Kalaallit Airports A/S peqqusinnaangilaat.

Kiisalu akit akinullu tunngaviusut aalajangersarneqarnerini Nuummi Ilulissanilu mittarfissat angalasunut, taakkunungalugu takornariat ilanngullugit, amerlanerungaatsiartunut pilersitsitsisinnaanissaat naatsorsuutigineqarpoq, tamatumalu malitsigisaanik inuiaqatigiinni kalaallini unnuisarfearnermut, inuussutissarsiornermik ineriartortitsinermut tamarmiusumut aammalu inuiaqatigiit suliffeqarnerullu uummaarinnerulernerannut aningaasaliisoqarnissaa, tamatumalu kingunerisaanik akileraarutitigut isertitat amerlanerulernissaat eqqarsaatigalugit.

Kapitali 6 pillugu:

Pisortat attaveqarnermut tunngatillugu sanaartugassaannut, Nuummi aamma Ilulissani nunanit tamalaanit mittarfinnik kiisalu Qaqortumi nunap immikkoortuani mittarfimmik sanaartornerup pisariaqalersitaanut aningaasartuutit akilerneqarnissaat pillugu Naalakkersuisut kommuninut isumaqatigiissusiorsinnaassasut **kapitali 6-imi** siunnersuutigineqarpoq.

Akisussaaffik aningaasalersuinissarlu pillugit qularuteqartoqaleqqunagu malitsitut attaveqaatinut killiussanik ersarissunik pilersitsinissaq aalajangersakkamut siunertaavoq.

§ 17-imi aalajangersagaq konto pingaarnermut 10.13.11-imut, aktiaateqarluni ingerlatseqatigiiffinnut toqqaannartumik aningaasartuutitut tunngasumut, oqaasertaliussamik nr. 3-mik ingerlatitseqqinneruvoq.

Kapitali 7 pillugu:

Kapitali 7-mi aalajangersagaq pinngitsaaliissummik taarsiissutitalimmik arsaarinnittarnermut tunngavoq aammalu pilersaarusiortarnermut inatsisip qanoq paasineqarnissaa pillugu nalornissuteqartoqaleqqunagu ilanngunneqarluni. Taamaalillunilu ilaatigut kinguaattoortoqarnissaa pinngitsoortinniarlugu pinngitsaaliissummik taarsiissutitalimmik arsaarinninnissamut inatsisitigut tunngaviup apeqquserneqarsinnaannginnissaa siunnersuuteqartumit aalajangiisuusutut isigineqarpoq.

Kapitali 8 pillugu:

Kalaallit Airports A/S-ip mittarfinnik sanaartornissamut atortussat imaatigut nassiussatut assartugassat pillugit assartuisartunut kikkunnulluunniit, tassungalu ilanngullugu Royal Arctic Linemut, neqeroortitsisinnaanissaa **kapitali 8-mi** aalajangersakkakut qulakkeerneqarpoq. Tamatumani usinik imaatigut assartuineq pillugu Inatsisartut peqqussutaat atuutinngilaq.

§ 19-imi aalajangersagaq konto pingaarnermut 10.13.11-imut, aktiaateqarluni ingerlatseqatigiiffinnut toqqaannartumik aningaasartuutitut tunngasumut, oqaasertaliussamik nr. 6-mik ingerlatitseqqinneruvoq.

Kapitali 9 pillugu:

Kapitali 9-mi aalajangersakkakut qulakkeerneqarpoq Kalaallit Airports A/S-ip Pisortanut naqissusiinermut akitsuummik akiliuteqartinneqannginnissaa. Ingerlatseqatigiiffik Namminersorlutik Oqartussanit pigineqarmat naqissusiinermut akitsuummik 31,5 mio. kr.-inik akiliinissaanik piumasaqarneq ingerlatseqatigiiffiup akiliisinnaassuseqarnissamut upalungaarsimaneranut naapertuutissanngitsoq siunnersuuteqartoq isumaqarpoq.

§ 20-imi aalajangersagaq konto pingaarnermut 10.13.11-imut, aktiaateqarluni ingerlatseqatigiiffinnut toqqaannartumik aningaasartuutitut tunngasumut, oqaasertaliussamik nr. 2-mik ingerlatitseqqinneruvoq.

Inatsisissatut siunnersuummi kapitali 9-mut Naalakkersuisut allannguutissatut siunnersuutaat:

Allannguutissatut siunnersuummi taamaallaat, siunnersuummi § 6-ip aggulunneqarnerata aammalu paragraffimik nutaamik ilanngussinerup malitsigisaanik, paragraffimut allanut innersuusummik sunniutaasumik iluarsineq, kisimi pineqarpoq.

Kapitali 10 pillugu:

§ 21-imi aalajangersakkami ulloq atortuutilerfissaq aalajangersimasoq allanneqanngilaq.

Inatsisissatut siunnersuummi kapitali 10-mut Naalakkersuisut allannguutissatut siunnersuutaat:

Allannguutissatut siunnersuummi ulloq atuutilerfissatut 22. oktober 2018 allassimavoq. Allannguutissatut siunnersuummik Naalakkersuisut saqqummiussineranni nalunaarutigineqarpoq aalajangersakkamut tassunga iluarsisummik nassiussisoqarumaartoq, tassani allassimassalluni inatsit akuersissutigineqarnermigut atuutilissasoq.

7. Siunnersuutip aningaasaqarnikkut kingunerisassai

Siunnersuutip kingunerisassai pillugit nassuiaatit uku, ilusiliinissamut piumasaqaatit naapertorlugit, inatsisissatut siunnersuummut nalinginnaasumik nassuiaatini ilanngunneqarsimapput.

- Pisortanut aningaasatigut allaffissornikkullu kingunerisassat
- Inuusutissarsiornermik ingerlataqartunut aningaasatigut allaffissornikkullu kingunerisassat
- Avatangiisinut, pinngortitamut inuillu peqqissusaannut kingunerisassat
- Innuttaasunut kingunerisassat
- Kingunerisassat annertuut allat

Inuiaqatigiit aningaasaqarnerannut kingunerisassanik misissueqqissaarneq

Mittarfiit tallineqarnissaasa inuiaqatigiit aningaasaqarnerannut kingunerisassanik misissueqqissaarneq, Alloriarneq 1-2, suliarineqarsimavoq. Misissueqqissaarneq Namminersorlutik Oqartussat sinnerlugit Deloittemit suliarineqarpoq.

Inuiaqatigiit aningaasaqarnerannut kingunerisassanik nalilersuinerit pillugit ilitsersuummi piumasaqaatit malillugit Alloriarneq 2-p imarai inuiaqatigiit aningaasaqarnerannut kingunerisassanik siamasinnerusumik naliliineq. Ilitsersuutit taamaattut assersuutigalugu Danmarkimi aamma atorneqartarput. Ilitsersuut pineqartoq Namminersorlutik Oqartussanit atugasatut naatsorsuussaavoq, tassanilu misissueqqissaarnerni sanilliussinissamut tunngavissat pitsaanerpaat qulakkeerneqarsinnaaqqullugit misissuinerit qanoq suliarineqarnissaat ilitsersuutigineqarpoq. (**Takuuk ilanngussaq 8**).

Ataatsimut isigalugu tunngavigisat atorneqartut:

- Misissueqqissaarneq ukiunik 25-inik piffissaliinermik tunngaveqartinneqarpoq (2018-2043)
- Nuummi, Ilulissani aamma Qaqortumi mittarfiit 2022-mi qaammatit pingasukkaani kingullerni atorneqalertussatut naammassisussaapput aammalu 2023-mi ukioq tamakkiisoq ingerlatsiviusoq siulliusussaalluni.
- Periarfissatut ilusiliani allani ilimagineqarpoq Kalaallit Nunaanni ilaasut ineriartornerat – kiisalu Kalaallit Nunaannut aamma Kalaallit Nunaannit – 2024-miit aguaqatigiissillugu 2,0 %-imik qaffassasoq.
- Aningaasat nalikilliartrornerannut akigititaaq 1,75 % atorneqarpoq.
- Ernialiussaq 4% atorneqarpoq.
- Naliusut sinnerat naatsorsuinerimi ilanngunneqanngilaq, tassami piffissap ukiunik 25-nik sivisussusillip iluani, aningaasaliinerit, aningaasartuutit aamma isertitat piffissap taassuma iluaniittut ilaatillugit, aningaasaliinissaq imminut akilersinnaanersoq takorusukkatsigu.

Kiisalu Naalakkersuisut paasissutissiissutigaat Namminersorlutik Oqartussat ingerlatseqatigiiffik 2025 tikillugu 2.100 mio. koruunit angullugit nammineq aningaasaatinik pilersusagaat. Ingerlatseqatigiiffik Nuummi Ilulissanilu mittarfinnut 1.500 mio. kr.-it tikillugit taarsigassarsisussaasaaq, taamaattumillu 2.000 mio. kr.-it tikillugit Namminersorlutik Oqartussat qularnaveeqqusiissuteqarnissaat naatsorsuutigineqarpoq. Nunatta karsiata aammalu aktiaateqarluni ingerlatseqatigiiffiit Namminersorlutik Oqartussanit pigineqartut akiitsunut qularnaveeqquusiinernullu pisussaaffii tamarmiusut 2017-imi 4,1 mia.kr.-init 2022-imi 6 mia.kr.-inut qaffassasut naatsorsuutigineqarpoq.

Aningaasaliinissat akilersinnaassusiannik naatsorsuinermit ullumikkut naliusoq malillugu naatsorsueriaaseq atorineqarpoq. Periarfissaq ullumikkut nalitunerpaaq iluaqutissartaqarnerpaavoq. Periarfissaq ullumikkut naliusoq malillugu amigartoorfiusoq imminut akilersinnaangilaq.

Inuiaqatigiit aningaasaqarnerannik misissueqqissaarnermi makkuninnga sanilliussilluneeq tunngavigineqarpoq:

- **Periarfissatut ilusiliaq aallaaviusoq**, ullumikkut mittarfiit ilusiligaanerisa ingerlatiinnarnerani sunniutaasussanik takutitsiviusoq, tassani mittarfiit tamarmik Mittarfeqarfinniitineqarlutik.
- **Periarfissatut ilusiliaq alla 1**, mittarfiit nutaamik ilusiligaanerisa kingunerisaanik Nuummi Ilulissanilu imarpik qulaallugu timmisartunut mittarfiit (2.200 m) aamma Qaqortum nunap immikkoortuani mittarfik (1.500 m) Kalaallit Airports A/S-imit pigineqarlutillu ingerlanneqartut. Tamatuma saniatigut Kangerlussuarmi Narsarsuarmilu qulimiguulinnut mittarfiit Namminersorlutik Oqartussanit pigineqartut aammalu mittarfiit allat sinneri tamaasa peqatigalugit MIT-mit ingerlanneqartut.
- **Periarfissatut ilusiliaq alla 2**, periarfissaq alla 1-imut naapertuuttoq, aallaasutigalugu Kangerlussuami nunap immikkoortuani mittarfimmut 1500 meterimut annertuunik aningaasaleeqqittoqartussaana.

Periarfissatut ilusiliaq alla 1-imi Kalaallit Airports A/S-ip ingerlatsinermut aningaasaler-suinermullu pilersaarutaani tunngavigineqartut, Inatsisartut mittarfiit takissusissai pillugit aalajangiinerinik, kiisalu aningaasanut inatsimmi oqaasertaliussat akuerineqartunik tunngaveqartut, annertunerpaatigut aallaavigineqarput, kisianni allaassutaalluni mittarfiit ilusiligaanerata tamarmiusup isiginiarneqarnera.

Mittarfiit allat tamarmik aamma qulimiguulinnut mittarfiit Kangerlussuaq aamma Narsarsuaq, Periarfissatut ilusiliaq alla 1-imi qulimiguulinnut mittarfinnut naleqqussa-gaasunik ingerlataqarfiusunut allanngortinneqartut eqqaassanngikkaanni, ullumikkutut ingerlatat annertussuseqartillugit, misissueqqissaarnermi ilanngunneqarput.

Periarfissatut ilusiliaq alla 2, Periarfissatut ilusiliaq alla 1-mi tunngavissat assigninik imaqqarpoq, kisianni ataasiakkaanik iluarsineqartunik:

- Kangerlussuaq qulimiguulinnut mittarfimmut taarsiullugu nunap immikkoortuani mittarfimmut 1.500 meterimut allanngortinneqarpoq, tamatumalu malitsigisaanik Periarfissatut ilusiliaq alla 1-imi qulimiguulinnut mittarfiulluni 75 mio. Koruuniugaluartut, 500 mio. koruunit missaannik aningaasaleeqqinnermut annertunerusunik aningaasartuuteqartussaalluni.
- Kangerlussuarimi mittarfimmi ingerlatsineq aamma allanngortinneqarpoq, taamaalilluni taanna qulimiguulinnut mittarfiunani nunap immikkoortuani mittarfiunera takuneqarsinnaalerluni. Missingersorneqarpoq Kangerlussuaq nunap immikkoortuani mittarfiuppat Mittarfeqarfiit ukiumut katillugit 75 mio. koruuninik ingerlatsinnermut tapiiffigineqarnissamik pisariaqartitsissasoq, Kangerlussuaq Periarfissatut ilusiliaq alla 1-imi qulimiguulinnut mittarfiuppat 60 mio. koruuniugaluarlutik.

Naalackersuisut paasissutissiinerat naapertorlugu mittarfiit maanna ilusiligaanerata pigiinnarlugu aningaasaliiffiginissaannut taarsiullugu Nuummi Ilulissanilu imarpik qulaallugu timmisartunut mittarfinnik kiisalu Qaqortumi nunap immikkoortuani mittarfimmik pilersitsinissaq Kangerlussuarimi Narsarsuamilu qulimiguulinnut mittarfiit ilanngullugit (periarfissaq 1) aningaasaqarnikkut iluaqutissarsiffiunerpaassaaq.

Periarfissatut ilusiliaq aallaaviusumi maannakkut naliusoq amigartoorfiulluni 1.085 mio. koruuniuvoq, Periarfissatut ilusiliaq alla 1-imi maannakkut naliusoq sinneqartoorfiulluni 280 mio. koruuniulluni, Periarfissatut ilusiliaq alla 2-imi maannakkut naliusoq amigartoorfiulluni 241 mio. koruuniulluni. Allatut oqaatigalugu, oqaatigineqartut maannakkut mittarfiit ilusiligaanerata attatiinnarnissaanit aningaasaliiffiginissaanillu, Nuummi aamma Ilulissani imarpik qulaallugu timmisartunut mittarfinnik, kiisalu Qaqortumi nunap immikkoortuani mittarfimmik pilersitsinissaq, iluaqutissartaqarpoq.

Malussarissutsimik misissueqqissaarneq

Misissueqqissaarneq, missingersuinerit arlallit assigiinngitsumik annertussusilinnik nalorninartortaqartut aallaavigalugit, suliarineqarpoq. Tunngavigineqartuni qitiusuni allanngornernut misissueqqissaarnerup patajaassuseqarnera takutinniarlugu, malussarissutsimut misissueqqissaarnerit arlallit suliarineqarput, tunngavigineqartuni qitiusuni allanngortarnerani inerniliussat qanoq allanngussanersut, takussutissiiviusumik.

Periarfissatut ilusiliat qulaajaavigineqartut inuiaqatigiit aningaasaqarneranni imminnut sanilliullutik inissisimanerat, malussarissutsimut misissueqqissaarnerup malitsigisaanik allanngunngilaq. Taamaattumik misissueqqissaarnermi inerniliussat tunngavigisat misissorneqartut allanngortinneqarnerannit sunnerneqanngillat. Taamaalillutik inerniliussat patajaatsorujussuupput.

Misissueqqissaarnerup pingaarnertut inerneraa, periarfissatut ilusiliaq alla 1 inuiaqatigiit aningaasaqarnerannut iluaqusiinerpaajusussaasoq, tulliulluni periarfissatut ilusiliaq alla 2 aammalu periarfissatut ilusiliaq aallaaviusoq inuiaqatigiit aningaasaqarnerannut iluaqusiinnginnerpaajusussaalluni.

Missingersuutini aningaasaqarnikkut misissueqqissaarneq

Missingersuutini aningaasaqarnikkut misissueqqissaarneq suliarineqarsimavoq. Missingersuutini aningaasaqarnikkut misissueqqissaarnermi takutinneqarpoq mittarfinnik sanaartornermut atatillugu aningaasat ingerlaanerit nunatta karsianut, taamaalillunilu aningaasanut inatsimmut qanoq sunniteqassanersoq. Naalakkersuisut paasissutissiisutigaat missingersuutini aningaasaqarnikkut misissueqqissaarnerup takutikkaat, annertunerusunik sipaarutissanik nassaarnissaq imaluunniit akileraarutininik qaffaanissaq pisariaqartinneqarani, Periarfissatut ilusiliaq alla 1 piviusunngortinneqarsinnaasoq. Periarfissatulli ilusiliaq alla 2, 2023-2025-imi 500 mio. koruuninik annertussuseqartunik annertunerusumik aningaasalersuinissamik pisariaqartitsinermit malitseqartussaasoq.

Misissueqqissaarnerup pingaarnertut inerniliussaa tassaavoq periarfissatut ilusiliaq 1 inuiaqatigiit aningaasaqarnerannit isigalugu iluaqutissarsiffiunerpaassasoq, malitsigalugu periarfissatut ilusiliaq 2 aammalu periarfissatut ilusiliaq aallaavisoq inuiaqatigiit aningaasaqarnerannut iluaqusiinnginnerpaassasoq. Periarfissat qulaajaavigineqartut taakku inuiaqatigiit aningaasaqarnerannit isigalugit tulleriinnilersornerat malussarissutsimik misissueqqissaarnerup kingunerisaanik allanngunngilaq. Taamaattumillu misissueqqissaarnermi inerniliunneqartut tunngavigisani allannguutinik misissorneqartunik sunnerneqanngillat. Taamaalillutillu inerniliussat pataajaatsupilussuullutik.

Inatsisissatut siunnersuummi matumani pineqartumi Kangerlussuarmi Narsarsuarmilu mittarfiit ilaanngimmata oqaatigineqassaaq. Kangerlussuarmi Narsarsuarmilu mittarfiit, Namminersorlutik Oqartussanit suli pigineqarlutillu Mittarfeqarfinit ingerlanneqartut, allanngortinneqarnissaat pisariaqassaaq. Kangerlussuaq Narsarsuarlu periarfissatut ilusiliani ilanngullugit naatsorsorneqarsimangippata, allamik allanngortoqanngippat tamatuma pissusissamisoortumik kingunerissavaa periarfissatut ilusiliaq 1-ip aamma 2-p inuiaqatigiit aningaasaqarnerannut pitsaasumik kinguneqarnissaat.

Kangerlussuup aamma Narsarsuup atorneqaannarnerisa annertussusaa sunniutaasussallu suleqatigiissitaliani marlunni Namminersorlutik Oqartussanit, Qeqqata Kommunianit aamma Kommune Kujallermit ilaasortaaffigineqartuni, qulaajaavigineqassasoq Naalakkersuisut paasissutissiisutigaat. Kangerlussuaq Narsarsuarlu pillugit nalunaarusianik periarfissanik assigiinngitsunik imaqartunik ataatsimiititaliamut tunniussisoqarpoq. Periarfissanik assigiinngitsunik imaqartumik Kangerlussuaq aammalu Narsarsuaq pillugit nalunaarusiat ataatsimiititaliamit tiguneqarput. (Takukkit ilanngussaq 9 aamma 10). Taamaattorli Kangerlussuarmi aamma Narsarsuarmi mittarfiit siunissami atorneqarnissaannut ingerlanneqarnissaannullu pilersaarummik inaarutaasumik innersuussinissaq, siunnersuutip matuma avataani inissisimavoq.

Inatsisissatut siunnersuummut Naalakkersuisut allannguutissatut siunnersuutaat:

Siunniussat pillugit isumaqatigiissutip inuiaqatigiit aningaasaqarnerannut sunniutissai
Kalaallit Airports A/S-imi Nuummi aamma Ilulissani nunanit tamalaanit mittarfiit sanaartorneqarnissaannut ingerlatseqatigiiffimmi immikkoortorta qarfiusumi aningaasaatit qaffanneqaqqinnissaannut ammaassisoqarpoq. 0,7 mia. koruunit tikillugit ataatsikkut akilerlugit aningaasaatinik qaffaanermut naalagaaffiup atsiortinnissaanut Naalakkersuisut piginnaatinneqarput. Taamaattoqassappat naalagaaffiup nammineq aningaasaatinit aningaasalersuinermit ilassutissai, Nuummi aamma Ilulissani nunanit tamalaanit mittarfinnik sanaartorneqarput. Taamaattoqassappat naalagaaffiup nammineq aningaasaatinit aningaasalersuinermit ilassutissai, Nuummi aamma Ilulissani nunanit tamalaanit mittarfinnik sanaartorneqarput. Taamaattoqassappat naalagaaffiup nammineq aningaasaatinit aningaasalersuinermit taarsigassarsianik aningaasalersuinissamut pisariaqartitsinermik annikillisitseqataassapput.

Naalakkersuisut aamma danskit naalakkersuisui taassuma saniatigut siunniussat pillugit isumaqatigiissummi isumaqatigiippat naalagaaffik Kalaallit Airports A/S-imi Nuummi aamma Ilulissani nunanit tamalaanit mittarfiit sanaartorneqarnissaannut ingerlanneqarnissaannullu ingerlatseqatigiiffimmut immikkoortorta qarfiusumut, katillugit 0,9 mia. koruuninik annertussusilinnik taarsigassarsitseqqissasoq aammalu Den Nordiske Investeringsbankimi taarsigassarsinissamut qularnaveeqqusiissasoq. Tamatuma malitsigisaanik Inatsisartut inatsissaattut siunnersuummi siunnersuutigineqareersumi allanngortitsinissamut pissutissaqalersitsisoqanngilaq.

Kiisalu siunnersuutigineqarpoq Nuummi aamma Ilulissani Namminersorlutik Oqartussat mittarfiisa tunniunnissaannut Naalakkersuisut piginnaatinneqassasut, ilanngullugit pigisat aalaakkaasut aamma teknikkikkut atortut imaluunniit taakkua ilai kiisalu Kalaallit Airports A/S-imut nunaminertanut pisinnaatitaaffiit taakkununga atasut. Tunniussineq isumaqatigiissuteqarnikkut imaluunniit aallarniutit akiliuteqarnikkut pisinnaavoq. Pigisat pineqartut nalinginut nalilersuinermit soqanngilaq. Siusinnerusukkat oqaatigineqartut taakku nalingi kukknersuuisumit naalagaaffimmit akuerisamit aalajangersaavigineqassapput. Nuummi aamma Ilulissani mittarfiit pioreersut nalingi ilisimaneqanngimmata, taakkua nalingat naatsorsuinermit 0 koruuniutinneqassasoq naatsorsuutigineqarpoq.

Siunniussat pillugit isumaqatigiissutip inuiaqatigiit aningaasaqarnerannut sunniutissai, danskit naalakkersuisuisa aamma Naalakkersuisut akornanni piginnittut isumaqatigiissutaata/aktiaatillit isumaqatigiissutaata pisussap imarisassaannut tunngatillugu tunngavigisat arlallit tunngavigalugit naatsorsorneqarput.

Tunngavigisat taakkua ilaatigut tassaapput:

- Kalaallit Airports A/S-imit Namminersorlutik Oqartussanut pissarsiarititassatut naatsorsuutigineqaqaartut 33 %-ii naalagaaffimmut agguagarsiaritinneqassapput.
- Aningaasalersuinermit aningaasartuutini sipaarutissat tamarmik atuisut akiliutaasa annikillisinnaannut atorineqassapput.
- Inuiaqatigiit aningaasaqarneranni misissueqqissaarnermi periaatsimut naapertuuttumik naatsorsuutigineqarpoq imarpik qulaallugu timmisartunut mittarfinnik atuisut 51

%-ii ”inuiaqatigiinnut attuumassuteqartuusut” (ilaasut Kalaallit Nunaannut attuumassuteqartut). Taamaattumik aningaasalersuinnermut aningaasartuutini sipaarutissat taamaallaat 51 %-ii inuiaqatigiit aningaasaqarneranni misissueqqissaarnermi naatsorsuinnermi ilanngunneqarsinnaapput.

- Sinneruttut 49 %-it takornarianut aamma sulinerminni angalasunut Kalaallit Nunaannut toqqaannartumik attuumassuteqanngitsunut tunngassuteqarput, taamaattumillu naatsorsuinnermi ilanngunneqaratik.
- Nuummi aamma Ilulissani mittarfiit pioreersut nalingi ilisimaneqanngimmata, taakkua nalingat naatsorsuinnermi 0 koruuniutinneqassasoq naatsorsuutigineqarpoq.

Tunngavissat siuliani allassimasut atorineqarpata, tamatuma nassatarissavaa periarfissatut ilusiliap aallaaviusup aammalu periarfissatut ilusiliat assigiinngissusiat 339 mio. kr.-inik annertuseriarnera, tamannalu imminnut akerleriittunik sunniuteqarnissaasa kingunerivaat. Iluanaarutinit naalagaaffiup pissarsiassai ullumikkut naliusoq naapertorlugu 145 mio. kr.-inut naatsorsorneqarput, tamatumalu peqatigisaanik erniatigut sipaarutissat ullumikkut naliusoq naapertorlugu 127 mio. kr.-iussapput aammalu akilersuutissaraluanik sipaarutissat ullumikkut naliusoq naapertorlugu 357 mio. kr.-iullutik. Ernianut taamatullu akilersuutissaraluanut sipaarutit katillugit 484 mio. kr.-it atuisut akiliutaasa appartinneqarnerannut atorineqassapput.

Periarfissatut ilusiliaq alla 1-imi maannakkut naliusoq 280 mio. koruuninit 619 mio. koruuninit annertusitinneqarpoq aammalu Periarfissatut ilusiliamut aallaaviusumut assigiinngissutaa 1.365 mio. koruuninit 1.704 mio. koruuninit annertusitillugu.

Periarfissatut ilusiliaq alla 2-mi maannakkut naliusoq -241 mio. koruuninit 98 mio. koruuninit annertusitinneqarpoq aammalu Periarfissatut ilusiliamut aallaaviusumut assigiinngissutaa 844 mio. koruuninit 1.183 mio. koruuninit annertusitillugu.

Naalackersuisut allannguutissatut siunnersuutaatigut periarfissatut ilusiliaq 1-ip aningaasaqarnikkut iluaqutissarsiffiunerpaanissaa allanngortinneqanngilaq.

Mittarfiit takissusissaat pillugit apeqqudit allat:

Mittarfinnut takissutigitinneqarsinnaasunik allanik assigiinngitsunit siunnersuuteqartoqarpoq, taakkulu aningaasatigut kingunerisassaata ujartorneqarlutik. Assersuutigalugu Ilulissani, Nuummi Qaqortumilu mittarfiit 1.199 meteriunissaannik aammalu Kangerlussuup Narsarsuullu nunatsinnut isaavittut atorineqaannarnissaannik piomasagaat saqqummiunneqarpoq.

Ineqarnermut Attaveqarnermullu Naalackersuisoq ataasinngornermi ulloq 6. august ataatsimiinnissamut Aningaasaqarnermut Akileraartarnermullu Ataatsimiititaliamit aggersarneqapoq. Siunnersuutip matuma, tassungalugu ilanngullugu mittarfiit 1.199 meteriunissaannik siunnersuutip, inuiaqatigiit aningaasaqarnerannut kingunerisassaasa tulleriinnilersorlugit saqqummiunneqarnissaannik Naalackersuisut qinnuigineqarput.

Ataatsimiititaliap qinnuiginninnerata Naalackersuisullu akissutaata kiisalu tamanna pillugu Deloittemit saqqummiunneqartut assilineri **ilanngussaq 3-itut** ilanngunneqarput.

Deloittep saqqummiussinera 1.199 meterinik sananissamut periarfissanik misissueqqissaa-rallarnernik takutitsivoq. Tassani periarfissatut ilusiliamut 3-mut aamma 4-mut ima mittarfiit takissuseqarneranni inerniliussat takutinneqarpoq:

	<u>Periarfissatut ilusiliaq 3</u>	<u>Periarfissatut ilusiliaq 4</u>
Kangerlussuaq	2.810 meter	2.220 meter
Narsarsuaq	(heliport)	(heliport)
Nuuk	1.199 meter	1.199 meter
Ilulissat	1.199 meter	1.199 meter
Qaqortoq	1.199 meter	1.199 meter
Mittarfiit heliportillu allat		

Inerniugallartut takutippaat periarfissatut ilusiliaq 3 ullumikkut naliusut naapertorlugit ilanngaaseereerluni -666 mio. kr.-inik kinguneqassasoq aammalu periarfissatut ilusiliaq 4 ullumikkut naliusut naapertorlugit ilanngaaseereerluni -616 mio. kr.-inik kinguneqassasoq. Taamaalillutillu periarfissatut ilusiliaq 3 aamma 4 periarfissatut ilusiliamit 1-imit 2-millu ullumikkut naliusut naapertorlugit ilanngaaseereerluni pitsaannginnerusumik kinguneqassasoq, taamaattorli periarfissatut ilusiliamit aallaaviusumit pitsaanerussallutik. Kiisalu inerniliigallarnerit takutippaat periarfissatut ilusiliap 3-p aamma 4-p kingunerisaannik sunniutissat periarfissatut ilusilianit 1-imit aamma 2-mit annertuumik ajornerussasut.

Tamatuma kingorna mittarfiit takissuserisinnaasaannut periarfissat allat naatsorsornissaannik Naalakkersuisut ataatsimiititaliamit qinnuigineqarput. Naalakkersuisut akissutaat **ilanngus-satut 6-3-itut** ilanngunneqarput. Naalakkersuisut paasissutissiisutigivaat periarfissatut ilusiliani pineqartuni kingullerni inuiaqatigiit aningaasaqarneranni taamatullu sanaaartornermut, missingersuutini ingerlatsinermilu aningaasaqarnikkut erseqqinnerusunik mississueqqis-saartoqanngimmat.

Peqqinnissaqarfimmut missingersuutini aningaasaqarnikkut sunniutaasussat

Suliassaq mittarfiliassatut ittoq taama annertutigisoq annertooujussuusorlu soorunami peqqinnissaqarfimmut sunniisussaavoq aammalu peqqinnissaqarfimmi allani malittaasumik sunniuteqanngitsumik aningaasaliissutit pioreersut iluanniitinneqarsinnaanngitsunik annikinngitsunik tamatumunnga naleqqiullugu aningaasartuuteqarnerulernermik malitseqartus-saalluni.

Naatsorsuutigineqarpoq aningaasartuutaanerulersut siunissami aningaasanut inatsisitigut aningaasaliissuteqarnerni suleriaatsit atorineqartartut atorlugit matussuserneqassasut.

8. Ataatsimiititaliap inaarutaasumik oqaaseqaatai

Siunnersuummi matumani inatsimmi tunngavissat aningaasanut inatsimmit ukioq ataasikkaartumit inatsimmut ataavartussamut ingerlateqqinneqartut siunnersuummut matumunnga Naalakkersuisut saqqummiussissutaanni oqaatigineqarpoq. Kalaallit Airports A/S taarsigassarsissanngorpat aningaasanut inatsimmi ukioq ataasikkaartumi tunngavissaqarnermit inatsimmut immikkoortumut allanngortitsinissaq pingaaruteqartoq Naalakkersuisut tamatumunnga tunngavilersuutigaat.

- Inatsisartut inatsisaat Kalaallit Airports A/S-ip suliaanut sinaakkutissiivoq aammalu taarsigassarsititsisut aningaasaliinissaannut taannalu aqqutigalugu sapinngisamik pitsaanerpaanik taarsigassarsinermut atugassaqaartitaanissamut pisariaqartunik qularnaarisussaalluni.
- Kiisalu siunnersuut ingerlatseqatigiiffiup aningaasalersuinerata tamarmiusup ilaatut, Kalaallit Airports A/S-imi nammineq aningaasaatinut tunngaviussaaq aammalu Namminersorlutik Oqartussat mittarfinnik nutaanik sanaartornermut qanittumi taamatullu ungasissumi aningaasalersuinermit peqataasinnaanannut ammaassilluni.
- Taarsigassarsititsinermi atugassarititaasut, qularnaveeqqusiinissamik piunmassaqaatit imaluunniit suliariumannittussarsiuussinerup inerner, inatsisissatut siunnersuummi isummerfigineqanngimmata siunnersuuteqartup erseqqissarpaa.
- Naggataatigut sanaartornermut illuliortiternermullu kiisalu taakkua aningaasalersorneqarnerannut isummernissamut, Inatsisartut siunnersuummik suliarinninnerat, tamatumalu kingorna Naalakkersuisut taarsigassarsititsinermut atugassarititaasunik, qularnaveeqqusiinissaq pillugu piunmassaqaatinik aamma suliariumannittussarsiuussinerup inerneranik suliarinninnerat kiisalu Aningaasaqarnermut Akileraartarnermullu Ataatsimiititaliap qularnaveeqqusiinissamik suliarinninnera apeqqutaasussaapput.

Siunnersuuteqartup saqqummiussissutaanni immikkoortut pingaernerit matuma siuliani allasimasut Naalakkersuisut allannguutissatut siunnersuutaannit annertuumik sunnerneqarput. Siuliani allasimasut ataatsimiititaliamit ima paasineqarput; taarsigassarsinissaq pillugu isumaqatigiinniarnissani naatsorsuutigineqartuni Kalaallit Airports A/S-ip pitsaanerpaamik aalaveqarsinnaanissaa inatsisissatut siunnersuummik saqqummiussinermi pingaernerpaasoq. Siunnersuutip saqqummiunneqarnerani Nunatta Karsia eqqaassanngikkaanni taarsigassarsisitsisinnaasut allat suli paasinarsisimangillat. Statsiministerimut siunniussat pillugit isumaqatigiissutip kingunerisaanik naalagaaffik 450 mio. kr.-inik taarsigassarsisitsisinnaavoq aammalu 450 mio. kr.-it tikillugit Nordisk Investeringsbankimit taarsigassarsinissamut qularveeqqusiinnaalluni. Naalagaaffiup aningaasaliissutissai 700 mio. kr.-it ilanngukkaanni, taamaalilluni taarsigassarsiarisassatut pisariaqartinneqaqqaartut 1.6 mia, kr.-it tamakkiisumik aningaasaliiffigineqarnerat anguneqassaaq. Taamaalillunilu inatsisissatut siunnersuummi § 7 naapertorlugu Nunatta Karsiata taarsigassarsinissamut qularnaveeqqusiinissaa taarsigassarsisitseqqinnissaalu pisariatissapput. Tamatuma peqatigisaanik § 7-imi aalajangersakamat allannguutissatut siunnersuummik saqqummiussisoqanngitsoq ataatsimiititaliamit oqaatigineqassaaq.

Taamaalillunilu Statsiministerimut siunniussat pillugit isumaqatigiissutip kingunerisinnaavaa Namminersorlutik Oqartussat, taamaalillunilu Nunatta Karsiata annaasaqaratarsinnaanerata annertuumik killilerneqarnera. Tamatuma peqatigisaanik Kalaallit Nunaata ullumi naliusoq naapertorlugu 339 mio. kr.-inik inuiaqatigiit aningaasaqarneranni iluanaaruteqarneruneranik siunnissat pillugit isumaqatigiissut kinguneqarpoq. Naatsumik oqaatigalugu isumaqatigiissutaasinnaasoq ullumikkut naliusoq naapertorlugu Danmarkimut 145 mio. kr.-inik Kalaallit Nunaannullu 484 mio. kr.-inik iluanaaruteqarfiussaaq. Taamaattumillu danskit akuunerat Kalaallit Nunannut iluanaaruteqarfiunerussaaq. Danskit akuunissaat akuerineqanngippat Danmarkip iluanaarutissaatut naatsorsuutigineqartut 145 mio. kr.-it annaaneqassapput, Kalaallilli Nunaata 484 mio. kr.-it tikillugit annassallugit. Iluanaarutissat taakku atuisut akiliutaasa annikillineqarnerannut atugassatut naatsorsuussaapput, tamatumalu kingunerissallugu billestit akiisa apparnerat.

Kiisalu periarfissat allat sulissutigeqqinneqarnissaat pillugu Inatsisartut aalajangiinissaat siunnersuutikkut siunniunneqanngitsoq ataatsimiititaliamit maluginiarneqarpoq. Sanaartugasat inaarutaasut sanaartornerlu kiisalu taakkuninnga aningaasalersuinissap isummerfigineqarnerat Inatsisartut siunnersuummik suliarinninnerannik, tamatumalu kingorna taarsigassar-sinissami atugassaritaasunik, qularnaveeqqusiinissamut piumasaqaatinik aammalu suliariumannittussarsiuussinerup inerneranik Naalakkersuisut suliarinninnerannik kiisalu Aningaasaqarnermut Ataatsimiititaliap qularnaveeqqusiinissamik suliarinninneranik tunngaveqassaaq.

Aningaasalersuinissamik toqqaanermi aammalu mittarfiit ataasiakkaat pingaarnersiorlugit tulleriiaaneranni makku naliliivigineqarnissaat Naalakkersuisunit siusinnerusukkut (UKA-2015/18) pingaartinneqarpoq,

- aningaasaliineq ingerlatsinermut aningaasartuutit aqutigalugit iluanaaruteqarfiussaanersoq. Tassalu aningaasaliissutit ingerlatsinermut aningaasaqarnikkut iluanaaruteqarfiussinnersut.
- aningaasaliineq ingerlatsinermut aningaasartuutinut tamarmiusunut matussusiinissamut naammangitsunik pissarsiaqarfiunersoq, kisiannili aningaasaliinermi ingerlatsinermut aningaasaqarnermi amigartoorutaasut amerlaqataannik amerlanerusunilluunniit tapiis-suteqartoqarnissaa imaluunniit tapersiissuteqartoqarnissaa pinngitsoortinneqarsinnaal-luni. Taamaattoqartillugu aningaasaliissutit inuiaqatigiit aningaasaqarnerat eqqarsaa-tigalugu suliat ingerlanissaannut sinneqartoortitsisussaapput.
- aningaasaliineq ingerlatsinermut aningaasartuutinut tamarmiusunut matussusiinissamut naammangitsunik pissarsiaqarfiunersoq, kisiannili aningaasaliinermi tapiis-suteqar-toqarnissaa imaluunniit tapersiissuteqartoqarnissaa pinngitsoortinneqarsinnaani. Tassa-lu aningaasaliissutit nammakkiissapput, inuiaqatigiinni ingerlatsinermiluunniit aningaa-saqarnermut iluanaarutaasussaanninnamik.

Atortussat saqqummiunneqartut tunngavigalugit ataatsimiititaliaq isumaqarpoq Ilulissani Nuummilu mittarfiit siullermut ilaassasut, Qaqortumi mittarfiup tullermut ilaanissaa naleqqunnerusoq kiisalu Kangerlussuaq Narsarsuarlu kingullertut taasamut ilaassasut.

Periarfissat akornanni toqqaanissamut siunnersuut una periarfissiivoq. Periarfissatut ilusiliap aallaaviusup periarfissatullu ilusiliat assigiinngitsut akornanni toqqaanissaq. Toqqaaneq allat toqqarneqannginnerannik nassataqarpoq. Periarfissatut ilusiliat arlaat toqqarneqarpat periarfissatut ilusiliaq aallaaviusooq toqqarneqassanngilaq illuatungaanullu. Assersuutigalugu periarfissatut ilusiliaq 1 toqqarneqarpat, taamaalilluni suliassaq ullumikkut naliusooq malillugu piffissap aningaasaliiffiusup ingerlanerani 280 mio. kr.-inik iluanaaruteqarfiusussaq toqqarneqassaaq. Tamatuma peqatigisaanik suliassaq alla ullumikkut naliusooq malillugu piffissami pineqartumi -1.085 mio. kr.-inik amigartoorfiusussaq toqqarneqassanngilaq. Paarlattuanik toqqaasooqarpat suliassaq -1.085 mio. kr.-inik amigartoorfiusussaq toqqarneqassaaq, tamatumalu peqatigisaanik suliassaq 280 mio. kr.-inik iluanaaruteqarfiusussaq toqqarneqarnani. Siunnersuut akuersissutigineqassappat ajornartorsiutip tamatuma assinga periarfissatut ilusiliap 1-ip aamma 2-p akornanni toqqaanissamut tunngatillugu Naalakkersuisunit aammalu Kalaallit Airports A/S-imit ajornartorsiutigineqalissaaq.

Statsministerimut isumaqatigiissutip malitsigisaatut Naalakkersuisut allannguutissatut siunnersuutaannut tunngatillugu taamatut aamma isiginiaasoqassaaq. Isumaqatigiissummut tamatumunnga pingaarnertutut inerniliussaq pingarneq tassaavoq; piffissap aningaasaliiffiusup ingerlanerani Kalaallit Airports A/S-ip sinneqartoorutitut tunniussaanit danskit pisassarisassa 145 mio. kr.-iussammata, tamatumalu peqatigisaanik piffissap aningaasaliiffiusup ingerlanerani Kalaallit Nunaata isumaqatigiissummit 484 mio. kr.-it iluanaarutigissallugit. 145 mio. kr.-it nammineq tigummiinnarnissaannik toqqaanikkut tamatuma peqatigisaanik 484 mio. kr.-it annaaneqassapput.

Naalakkersuisut allannguutissatut siunnersuutaata saniatigut inatsisissatut siunnersuummut matumunnga allannguutissatut siunnersuutinik allanik isumaliutissiissutissap naammassineqarnissaa sioqqullugu saqqummiussisoqarsimanngitsoq ataatsimiititaliamit maluginiarneqarpoq.

Ataatsimiititaliami amerlanerussuteqartut Siumut Demokraatillu ilaasortaataat siunnersuut pillugu ima oqaaseqaateqarumapput:

Angallannerup aqqissuussaanerata pitsaasuunissaa, isumannaatsuunissaa imminullu akilersinnaanissaa pingaartillugit Nunatsinni angallannikkut aqqissuusseqqinnerup ingerlanneqarnissaa Siumup Demokraatillu anguniaramikku inassutigaat:

- Ilulissani mittarfissuaq sananeqassasoq – 2.200 m
- Nuummi mittarfissuaq sananeqassasoq – 2.200 m
- Qaqortumi nunap immikkoortuani mittarfissuaq sananeqassasoq – 1.500 m

Mittarfissuit sanaartornissaannut il. il. aningasalersuinissaq pillugu Naalakkersuisut Siulittaasuata Kim Kielsen-ip danskillu Naalakkersuisuisa siulittaasuata Lars Løkke Rasmussen-ip isumaqatigiissutaat Siumup Demokratillu taparserpaat, taassumalu aningaasalersuinissanut killiliussat iluanni naalakkersuisunit siunnersuutigineqartut atuutsinneqarnissaa inassutigalugu.

Sisimiut Kangerlussuullu akornanni angallannikkut tunngaviusumik aaqqissugaanerup pitsaanerpaamik akilersinnaasumillu aaqqiissuteqarfiginissaa Siumup aamma Demokraatit peqataaffiginiarpaat. Tamannalu suliaq Qeqqata Kommunia peqatigalugu ingerlateqqinneqassaaq.

Siumut aamma Demokraatit naalakkersuisunut kaammattuutigaat, aningaasalersorneqarneq pillugu aningaasaliisinnaassuseqartut oqaloqatigiuaannartariaqaraat. Tamatumani suliniutit inuiaqatigiit aningaasaqarnerannut iluaqutaasussat pitsaasumik aningaasalersorneqarnissaat qulakkeerniarneqartassalluni.

Siumup Demokraatillu inassutigaat Inatsisissatut siunnersuut Inatsisartunit akuersissutigineqassasoq.

Ataatsimiitaliami ikinnerussuteqartut Inuit Ataqtigiit ilaasortaatitaat siunnersuut pillugu ima oqaaseqaateqarumapput:

Inuit Ataqtigiit tunngaviusumik mittarfinnik allilerinissaq mittarfinnillu nutaanik sanaartornissaq pitsaasuutillugulu isumaqatigaat. Taamaammat mittarfiliornissanut siunnersuusiamik tamat oqallinnerannit partiittalu oqaloqatiginnittarneri aallaavigalugit nuna tamakkerlugu naaperiutitut isumaqatigiissutigineqarsinnaasumik saqqummiussivugut. Siunnersuusiatsinni mittarfiliortiternerit kittaartumik ingerlanneqarnissaat aallaaviuvoq, taamaaliornikkut nunatta aningaasaqarnerani akit qaffapiluunnginnissaat suliffeqarfeqarnikkullu nammassisinnaajunnaanginnissaq qulakkeerumallugu, taamaaliornikkullu aamma piffinni sanaartornermik ingerlatsillutillu sulisartullu nunatsinneersut amerlasuut kiisalu taakku malitsigisaannik inuussutissarsiutit allat mittarfinnik allilerinerni peqataasinnaaqqullugit.

Tamatuma saniatigut Nuup mittarfiata suilliullugu allineqarnissaa siunnersuutigaarput, taannami piaarnerusumik annertunerusumillu sinneqartoorutaasussaavoq. Kangerlussuup piunnarnissaanik kissaateqarnerput erseqqissumik nalunaarutigaarput. Ilulissani mittarfiup allilernissaa tulliussoq isumaqarpugut, inissiffissaanilu nutaami siunissami suli allilereqqinnissamut periarfissalimmi inissinneqassasoq. Tassungalugu atatillugu Ilulissani Qeqertarsuullu tunuani tikittunik sullissisussat ataatsimut isigalugu ineriartortinneqarsimanissaat pingaartutut isigaarput, taamaaliornikkut piffimmi ingerlatsisut takor-narianik tikeralersussatut ilimagineqartunik iluaquteqarsinnaaqqullugit kiisalu aalisar-

nermi nioqqutissanillu suliareriikkanik periarfissat annertunerulersussat iluaqutigineqarsinnaaqullugit. Taamattaaq Naalakkersuisut Qaqortumi mittarfissat tikikkuminassusaa pillugu erseqqissumik akissuteqassasut kissaatigaarput, 80 procent ataallugu tikkkuminassuseq naammaginatutut isiginngilarput.

Narsarsuutaaq siunissaa pillugu erseqqissumik akissuteqartoqarnissaa kissaatigaarput.

Partiit allat Naalakkersuisulluunniit mittarfinnut tunngasunik isumaqatiginninniarnernik pimoorussanik aggersaasimanninnerat uggornartutut isigaarput. Ataatsimiititaliani sulineq paasissutissanik amikkittoortuarfiulluni ingerlanneqarpoq, isumaqatiginninniarnertullu iluseqanngitsumik ingerlanneqarsimallutik. Atituumik isumaqatigiissuteqarnek naalakkersuisooqatigiit illuatungiliuttullu akimorlugit isumaqatigiinnertut isigaarput. Suliassami taama annertutigisumi nunatsinnullu inuiaqatigiinnullu taama sunnuteqartigisussami atituumik isumaqatigiissusiortoqarusuttoqannginnera naammaginangitsutut isigaarput.

Isumarput naapertorlugi immitsinnut ungasinngikkaluarpugut, tassani Qaqortup mittarfissaata tikikkuminassusaa, amerikamiullu Kangerlussuarimi mittarfinniluunniit allani soqutigisaqarnerat pillugu paasissutissanik suli amigaateqartoqarnera eqqarsaatigalugu.

Immikkulli maluginiarparput sanaartornissamut inatsit una aqutigalugu 2015-mi ukiakkut Inatsisartut immikkoortut 18 aamma 167 aqutigalugit Naalakkersuisunuut suliakkiissutaanni suliassap ilamernga taamaallaat suliarineqarmat. Suliakkiissummi “nunatsinni assartuussinermi ataatsimut aningaasartuutit annikillisinnissaat aamma timmisartuussisarnerup akulikillinissaa siunertaralugit, nunap immikkoortuini silaannakkut angallanermut attaveqaatit ataatsimoortut silaannakkut angallassinermut pilersaarummut ilanngunneqarnissaannik” (UKA15/167) aamma aalajangiisoqarpoq. Tamanna suli pinngilaq.

Avataanit suliarortut sulisartullu nunaqavissut sulinermi akissarsiaqarnikkullu atugaasa nikingassuteqannginnissaannik oqariartornerat isumaqatigaarput. Taamaammat SIK-p Kommuneqarfik Sermersuullu avataatit suliarortitanut akileraartitsinikkut immikkut aaqqissuussinissamut aarleqquteqarnerat paasilluarlugulu isumaqatigaarput.

Maluginiarparput inatsimmik piareersaanermi avataanit suliarortussat amerlasuut tikinnerisigut peqqinnissaqarfiup pisinnaasaqarnikkut unammillerneqarnissaa naammattumik qulaajaaffigineqarsimangimmat.

Aamma malugaarput inatsimmik piareersaanermi nunaqarfinni marlunni suliffeqarferujussuarnik matusinissaq qanoq malitseqarsinnaaneranik naammattumik qulaajaavigineqarsimangimmat, nunaqarfinni taakkunani innuttaasut pillugit naammattumik pilersaarusiortoqarsimanginnera tunngavigalugu. Isumaqarpugut nunatta inoqarfinni suliffiuninik matusinikkut innuttaasut nuuttariaqalernerisa qanoq kinguneqarsinnaanera ilinnitigereeripput, kukkussutillu taakkua uteqqissanngilagut.

Naalakkersuisut Siulittaasuata danskillu ministeriunerata siunnerfeqaqatigiinnermik oqariartuutaannut tunngatillugu, sulinermi suli isumaqatigiissutivimmik isumaqatigiissuteqartoqarnanilu ingammik suliarni sukumiisunik saqqummiussisoqanngitsoq isumaqarpugut. Folketingip Inatsisartullu siunnerfeqaqatigiinnermik oqariartuummik akuersisussaananerat

immikkut maluginiarparput. Tamannalu sulii pinngilaq. Naalagaaffik piginneqataassappat, Naalagaaffik naaggaarsinnaatitaasutut inissisimassanngitsoq piumasaraarput. Namminer-sorlutik Oqartussat sukkuulluunniit suliffeqarfimmi piginneqataassutit minnerpaamik 50 procentiinik piginnittuunissaat, iluanaarutisianut tunngatillugu piumasaqaatit erseqqis-suutinneqarnissaat kiisalu ernianut akilersuutissanullu iluarinartunik piumasaqaateqar-toqarnissaa piumasaraavut.

Kangerlussuup allangortinneqarneratigut sillimaniarnikkut illersornissakkullu politikimut attuumassutillit qulaajarneqarsimanngitsut isumaqarluinnarpugut, inatsisartullu naammattumik paasitinneqanngillat. Siunersiunissat arlallit piumasarisimavavut, kingullermik Ilulissat mittarfiata 2800 meteriutinnissaanut amerikamiut milliartilikkaanik aningaasa-leeratarsinnaanerannut tunngatillugu. Siunersiunissamik piumasaqarnerput amerlanerus-suteqartunit piumaneqanngilaq. Ataatsimiititaliap pissutsinik tamakkununga qulaajaane-qarnani isumaliutissiissummik uannga atsiornera naammaginangitsoq isumaqarpugut. Innuttaasut angallannerannut mittarfiit sakkutooqarnermut atorneqarsinnaanngorlugit ilanngussisoqassanersoq apeqqummut innuttaasut siammasissumik peqataatinneqarnissa-minnut pisussaaffeqarfineqartut isumaqarpugut. Kalaallit Nunaata Issittumi sakkul-ersoqqinnissamut nunaminertanik atuiffineqassanngitsoq uagut erseqqissumik isuma-qarpugut.

Danskit naalagaaffiannut assingusumik amerikamiut qanoq aningaasaliiniarnerminnik eqqarsaatersuteqarnersut kiisalu amerikamiut mittarfinnut suliamut ilanngunneqassap-pata kalaallit amerikamiullu (immaqalu aamma danskit) tungaannit suut ilanngullugit piumasaqaatigineqarniarnersut paaserusuppavut. Suliffeqarfimmut aningasaaliinikkut piginneqataaneq imaluunniit allatut ilusilimmik peqataaneq pineqarpa? Piginneqataaneq pineqarpat, taava nunatta karsianut tunngatillugu pissutsit qanoq isikkoqassappat?

Amerikamiut aningaasaleeratarsinnaanerisa malitsigisaannik illersornissakkut isumaqati-giissutit, ingammik amerikamiut mittarfiliortiternernut peqataassappata pisoqalisoor-simalersussat, isumaqatiginninniutigineqannginnissaannik piumasaqaammik malitseqartit-sisoqassasoq isumaqarluinnarpugut.

Pissutsit tamakku Nunanut allanut Naalakkersuisup, Naalakkersuisut Siulittaasuata imaluunniit Attaveqatigiinnermut Naalakkersuisup isumaliutsiissutip uuma atsiorne-qarnissaa sioqqullugu akisinnaanagillu akiumanngimmatigit maluginiarparput.

Inuit Ataqtigiit akuttunngitsumik ineriartortitsinermik kigaallisaasutut pingaarutilin-nilluunniit aalajangernissamut qunusutut pisuutinneqartarpugut. Mittarfiit imminerminni ineriartortitsinavianninnerat namminiilivitsitsinavianninnerallu erseqqissarumavarput. Akerlianik mittarfiliortiternerit malitsigisaannik suliani annertuuni toqqaannartumik nunaqavissunik akuutitsinerit, mittarfinnullu atasunik sunniuteqaataasumik inuussu-tissarsiutit iluatsittumik ingerlanneqarpata, taassuma tungaanut iluaqutsiissapput. Tassa-nilu nunaqavissut akuutinneqarnissaannut, piffinnilu aamma Nuup, Ilulissat Qaqortullu avataanni ineriartornernut pilersaarummik erseqqissumik amigaateqartoqartoq isuma-qarpugut.

Kalaallit innutaasut mittarfiliortiterni malitseqaataasumillu inuussutissarsiutinik iluaqutissanut isiginnaartuunnarnissaat kissaatiginnilarput. Nammineq sulissaagut, namminerlu suleqataassaagut. Asfalti imminnermini tamakkunanga pilersitsiunnangilaq. Taamaammat mittarfiliortiterni piffinni nunallu immikkoortuini ineriartornermik, isumaginninnikkut peqqinnissaqarfimmi isumaginninnermilu tunngasuni siuariarnermik, meeqqat atuarianni ilinniartitaanernilu ataatsimut isigalugu siuariarnermik malitse-qartinneqarnissaat piumasaraarput, taakkumi asfaltip manngertikkiartornerani uagut inuit toqqammavissarigatsigit.

Ilinniartitaanernut, isumaginninnermut peqqinnissaqarfinnillu tunngasuni immikkoortut politikikkut toqqaannartumik pingaarnertinneqarlutik amerlanerusunik aningaasaliivigineqarumanginnerat imminut assortortutut isigaarput, taamaaliornikkummi attaveqaatit nutaat tamakkiisumik iluaqutigissagatsigit.

Ataatsimiitaliami ikinnerussuteqartut Suleqatigiissitsisut ilaasortaataat siunnersuut pillugu ima oqaaseqaateqarumavoq:

Suleqatigiissitsisut oqaatigaat pisariaqartinneqartumik ataqatigiissitsisoqarnissaa anguneqarsimanngitsaq assartuinnermut aningaasartuutit ataatsimoortut eqqarsaatigalugit imaluunniit timmisartuussinerit amerlinissaat eqqarsaatigalugu, Sanaartornermut Ataatsimiitaliap UKA 2015/18-mi inassutaani oqaatigineqaraluartut. Taamatuttaaq Suleqatigiissitsisuni isumaqarpugut UKA2015/167 naammassineqarsimanngitsaq.

Manaa siunnersuut immikkoortoq UKA2018/21 taamaasilluni imaqqangilaq mittarfiit imaluunniit helikopteritut mittarfiit millinissaannut/ allinissaannulluunniit tunngasunik. Siunnersuummi taamaallaat pineqarpoq timmisartunut suluusalinnut mittarfiit pingasut sananeqartussat Nuummi, Ilulissani Qaqortumilu.

Suleqatigiissitsisuni isumaqarpugut aalajangiinissamut tunngavissat amingartut UKA-2018/21-mut tunngatillugu. Pissutaavoq nuna tamakkerlugu sipaarutaasussatut takorluugaq imaluunniit akulikinnerusumik angallassisalernissap naatsorsorneqarsinnaanginnera ersarissumik pilersaaruteqarfiginagit mittarfiit sorliit allat aningaasaliiffigineqassanersut aamma aningaasaliissutissat qanoq nassaarineqassanersut.

Suleqatigiissitsisuni isumaqarpugut, assartuineq ataqatigiissinneqassappat pisariaqartoq kiffartuussinnermut isumaqatigiissutit naleqqussarneqarnissaat, nutaamik mittarfiliortiterni kalluarneqanngitsoortussanngimmata. Taamaasilluta Suleqatigiissitsisuni nalilerparput tamakkiisumik isiginnineq qularnaarneqarsimanngitsaq - naak 2015-mi taamaattoqarnissaa pillugu aalajangiisoqareersimagaluartoq, tamannami tunngaviummat matumunnga siunnersuummut.

Tamatuma saniatigut isumaqarpugut taama annertutigisumik akiitsoqalernissaq ammanerusumik pissuseqarfineqartariaqaraluartoq aamma pitsaanerusumik pilersaarusiorneqarsimasariaqaraluartoq matumunnga mittarfiliortiternissamut atatillugu. Ataatsimut inatsisiliaasut paasilluarsinnaajumallugit manna immikkoortoq Aningaasanut Inatsissamut ilanngullugu suliarineqartariaqaraluartoq, inatsisinut attuumassuteqartunut

siusinnerusukkut aalajangiisarsimanernut atatillugu suliarineqartariaqarluarpoq taama-tullu peqqissutsimut inatsimmut aamma inatsisinut allanut sulii akuerineqanngitsunut - taakkumi pisariaqarput tamakkiisumik ataqatigiisumik aalajangiisoqassappat.

Suleqatigiissitsisuni isumaqarput naapertorlugu taama angitisunik aningaasaliinissamut naammattunik aalajangiinissatsinnut tunngavissaqanngilagut eqqarsaatigalugu manna aalajangiineq annertuumik piffissamilu sivisuumi sunniuteqartussaammat.

Aamma tamakkiisumik takusinnaangilarput iluanaarutissatut naatsorsuutigineqartut, saniatigut aalajangingassat amerlammata akilersinnaassutsip sunnernissaanut.

Sulii aalajangeqarneqanngilaq Kangerlussuarmit mittarfik qanoq pissanersoq aamma taamaappoq Narsarsuaq eqqarsaatigalugu aamma tusagassiutini atuarparput immaqa Ilulissani mittarfiliornissamut amerikamiut aningaasaleeqataajumaartunngooq. Tassa imaappoq, akisoqisumik sananissamut aalajangiinissamut tunngavissaq naammattumik qaammarsaatigineqanngilaq.

Aamma pineqarput atlantiku qulaallugu timmisartorsuit mittarfissaat marluk, soorlu tamanut saqqummiunneqartuni allaaserineqartut. Suleqatigiissitsisuni isumaqarpugut maannakuugallartukkut tamanna akilersinnaangikkallartoq.

Aamma kissaatigineqarpoq mittarfiit pingasut tamakkiisumik sanaartorneqassasut sanaartornerit tullerriaarnagit. Tamanna Suleqatigiissitsisuni aamma tapersorsinnaangilarput.

Aningaasaqarnermut Akileraartarnermullu ataatsimiititaliami ikinnerussuteqartut itigartinneqarput aappassaaneerinissap tungaanut isumasioqatigiinnissamut kissaatigarnerminni.

Paaseqatigiissinnaagaluarnertit taamaasillutik itigartinneqarput siunnersuutip aappassaaneerneqarnissaata tungaanut, sualummik aningaasaliinissaq taamatullu avataaneersut aningaasaliinissanerat eqqarsaatigalugu kissaatigisimagaluarparput apeqqutit arlallit eqqarsaatigalugit paasisaqarnerunissarput. Paasivarput ataatsimiititaliami partiit allat oqaatigimassuk, ataatsimiititaliat allat, immikkoortumik suliaqartuusut; tassaasut Aningaasaqarnermut Akileraartarnermullu Ataatsimiititaliaq, Nunanut Allanut Tunngasunut ataatsimiititaliaq kiisalu Sanaartornermut Ataatsimiititaliaq paasissutissanik assigiinnik peqanngitsut. Tamatuma paaseqqissaarnissaa assut kissaatiginaraluarpoq.

Tamatuma saniatigut naatsorsuinerit nalunaarutillu isertuussassasut naqitat Inatsisartunilu aalajangiisussanit takoqqusaanngitsut piupput taamaattumik tamanna pissutigalugu aamma siunnersuut manna ilalersinnaangilarput.

Tamatuma saniatigut oqaatigerusupparput isornartutut isigigatsigu Kalaallit Airports A/S-mi aningaasaliissutit Aningaasanut Inatsimmi kontuni assigiinngitsuneermata kiisalu Namminersorlutik Oqartussat suliffiutaasa sinneqartoorutitut akiliutissaaninngaanerlutik uffa taakku innuttaasut kiffartuunneqarnerannut atorluarneqarsinnaagaluartut.

Peqataanik kissaatigaarput paaseqqissaassallugu avataaneersut aningaasaliissutissaat, Danmarkimut Illersornissap pillugu Isumaqatigiissutip 2020-mi isumaqatigiinniutigeq-

qinneqarnissaa kiisalu amerkamiut allamiulluunniit Kalaallit Nunaanni mittarfiliornermut atatillugu aningaasaliissutissaasa minnerpaamik Inatsisartuni paaseqqissaarnissaat - ajornannppalli tamat akuutillugit - imaluunniit paasissutissiineq aqputigalugu aamma innuttaasut oqalliseqatigalugit.

Tassa imaappoq mittarfiliortiterneq pillugu siunnersuummi UKA2018/21-mi suliaq pillugu immikkut aningaasartuutaasinnaasut ilaatinneqanngillat, taakkulu ilaatinneqarnissaat pisariaqartutut isigigaluarparput.

Tassunga atatillugu aamma kommunit taarsigassarsinerunissaaqq, kiffartuussinermut isumaqatigiissutit allannngortinnissaat minnerunngitsumillu pingasunik mittarliornerit innuttaasunut akitsuutinik artukkersuutaanissaat imaluunniit pisortat tapiissutissaat aamma/imaluunniit akileraarutit qaffatinneqarsinnaanerit paasisaqarfigerusupparput.

Taamatutaaq aamma kissaatigaarput billit akiisa qanoq kalluarneqarsinnaanerit paasisaqarfigissallugu, Air Greenlandip pisiarinerata kingunissai takusinnaajumallugu aningaasaliissuteqarnissakkut tunngavissat qanoq ittuunersut. Kissaatigineqarpoq Atlantiku qulaallugu timmisartuussinerup unammilleqatigiiffiunissaa tamannalu paasilluakutoorsinnaavarput.

Peqataanik kissaatigineqarpoq Air Greenlandimut tamakkiisumik piginnittuulernissaaq, taamaasillunilu nunanut allanut timmisartuussinermit unammileqataasussanngortillugu.

Kisianni aamma naatsorsuutigineqarpoq nunami namminermi timmisartuussinermit tapiissuteqartarnissaaq ingerlatiinnarusunneqarpoq taamaasilluni tapiisaqattaartarnerit maannakkut atuuttut atorunnaartussaassapput.

Suleqatigiissitsisuni taamaasilluta alla aqputissaasorinngilarput tassalu kiffartuussinermut isumaqatigiissutit aningaasartaqarnerulissasut, akinik qaffaanermut naleqqiullugu. Tamanna pillugu pilersaarutit paaseqqissaarusuppagut imaluunniit malittaamik aningaasartuuteqarnerunissat qanoq isikkoqassanersut.

Apeqquteqaqattaartaraluarluta aamma akineqarnissatsinnut kissaateqartaraluarluta immikkoortunut tunngasut suli akissuteqarfigineqanngillat, taamaattumik inassutigisinnaanngilarput matuma timmisartunut mittarfiliortiternissamut siunnersuutip akueqarnissaa.

Isumaqarpugut manna siunnersuut immikkut ataatsimiinnermi oqallisigineqartariaqaraluartut, ataatsimiititaliat susasaqartut Inatsisartunilu ilaasortat immikkut aggersarlugit aamma suliaralugit apeqqutit tamaasa akissutillu, matumunnga siunnersuummut atatillugu saqqummersimasut kiisalu apeqqutit manna tikillugu suli akissuteqarfigineqarsimannngitsut suliariumallugit.

Tassani ataatsimiinnermi mittarfiliortiternissamut siunnersuut aalajangiiffigineqarsinnaassagaluarpoq Inatsisartut tamaasa peqataatillugit, ataatsimiinnermilu allarpaasut aamma isummerfigisariaqartakkagut ilaatigut annertoorujussuusinnaasartut soorlu assersuutigalugu ukiunut tulliuuttunut Aningaasanut Inatsisissaq.

Pivagut Kalaallit Nunaata oqaluttuarisaanerani aningaasaliissutissat assissaqanngitsut, taamaattumik immikkoortoq taanna sukumiinerulluinnartumik suliarisariaqaraluarpoq misissoqqissaarneqarlunilu.

Tamanna tunngavigalugu Suleqatigiissitsisuni Naalakkersuisunut inassutigissuarput, siunnersuutip pingajussaaneerneqannginnerani, allannguutissamik siunnersuuteqaqqullugit makku pissutsit pillugit:

UKA2018/21-mut tunngatillugu immikkoortut tamarmik - 2019-mut Aningaasanut Inatsisissamiittut peerneqassasut, ilanngunneqassasullu inatsisiliarineqartussanut.

Ilanngullugit inatsisini allani allannguutaasussanut pisariaqarsinnaasut tamaasa; soorlu Peqqinnissaqarfimmi taakkulu inatsisit tamarmik eqiterneqassasut saqqummiunneqarlutillu Inatsisartunut immikkut ataatsimiinnermi.

Taamatuttaaq kissaatigaarput ataatsimiititaliat susassaqtut tamarmik akuutinneqassasut aamma Inatsisartuni ilaasortat tamarmik suliamut ilaatinneqassasut, ataatsimiititaliani sorlarni issianerat apeqqutaatinnagu.

Aamma ataatsimiititaliat isumasioqateqarsinnaatitaassasut kiisalu paasissutissanik tamanik tunineqarsinnaassasut periarfissinneqarlutillu toqqaannartumik inatsisitigut allannguutissanut misissuinissaminut - imaluunniit toqqaannanngikkaluamik mittarfi-liortiternissamut siunnersuutip akuerineqarsinnaanerata kinguneranik.

9. Ataatsimiititaliap inassuteqaataa

Siuliani allassimasut tunngavigalugit allannguutissatut siunnersuut taamatullu siunnersuutaaqqaartoq **akuerineqassasut ataatsimiititaliami amerlanerussuteqartut** partiit Siumup aamma Demokraatit ilaasortaataasa inassutigaat.

Siuliani allassimasut tunngavigalugit allannguutissatut siunnersuut taamatullu siunnersuutaaqqaartoq **itigartinneqassasut ataatsimiititaliami ikinnerussuteqartut** Inuit Ataqtigiit aamma Suleqatigiissitsisut ilaasortaataasa inassutigaat.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

Mala Høy Kúko

Sara Olsvig

Karl Kristian Kruse

Jess Svane

Aqqaluaq B. Egede

Niels Thomsen

Tillie Martinussen